


00 Gr

28
18
9m



Kurzer vnd Warhafftiger

Bericht:

Was Schwärer vnd

Mühseliger allerhand Kranckheiten/

Vom Jahr 1596. bis ins 1599. wol vnd glücklich seyen ge-
heilet worden/durch die Gnad Gottes/ vnd wunderbarliche wir-
kung des Wunderbads zu Boll im Herzogthumb
Württemberg gelegen/so da newlich
erfunden/

Durch den Durchleuchtigen vñ Hoch-
gebornen Fürsten vnd Herrn/ Herrn Friderich Herzog
zu Württemberg vnd Teck/ Graff zu Mümpelgart/ıc.

Vnd durch den Hochgelehrten vnd Weitberümbten H.
Ioannem Bauhinum S. Württemb. Archiatrum/Newlich
eigentlich vnd weitleufftig beschrieben vnd in
druck verfertigt worden/

Sampt vielen denckwürdigen Historien / von jme vnd anderen da-
selbst auß gegenwürtiger erfahrung hinzugethan.

Jetzund aber

Dise Exempel trewlich verzeichnet worden / durch den
Hochgelehrten H. Ioan. Rentzium S. W. Medicum
im ermelten Wunderbad.

Damit ein jeder sehen könne/ was wunderlicher Wirs-
kung/ Gott der Schöpffer/disem heilsammen Brunnen
eingegossen/ vnd menniglich Gott darumb
dancken/vnd mit desto besserer zuversicht
desselbigen nutzen vnd gebrau-
chen könne.

Gedruckt zu Mümpelgart / durch Jacob
Foillet/ S. W. Buchtrucker.

M D X C I X.



Barhaffte eigentliche Conterfactur/

des Hochgelehrten vnd berümpften Medicis/
Herrn Joannis Bauhini/

Des Durchleuchtigen Hochgebornen Fürsten vn̄ Herrn/
Herrn Friderich Herzogen zu Württemberg vnd Teck/
Grauen zu Mümpelgart/ıc Leibmedici/ıc.

Dann Bauhinus der Arzney/
Doctor ist abgemahlet frey.
Wie man allhie mit Augen sieht/
Vnd vns die Bildnuß klärlich b'richte.
Zußerlich g'stalt mahlen kan/
G'schicklichkeit aber den Man
Ban man nit mahlen eygentlich/
In dem Malt er selber sich/
Das er sey ein recht Medicus.
Vnd berümpfter Philosophus.
Dann was in der Natur der frist/
Zwar im auff's best erkundt ist.
Zu Boll brym Wunderbrunnen nun/
Hatt diser Herr das best gethan.
Denn er mit fleiß b'schriben der zeit/
Das er werd kundbar weit vnd breit.
Was vilen lang zeit wer verborgen/
Bringt er an tag mit grossen sorgem.
Drumb dann jr f. Gnaden zwarn/
In erwölt han vor langen Jern
Zu jrem Leibartz jederzeit/
Drumb er denn willig vnd bereit/
Zuffire f. Gnaden gut/
Mit seim höchsten fleiß warten thut.
In liebet sehr der Adelschon/
Die Baurleut im vil ehr anthon.
Gott laß in leben lange zeit/
Geh in die Ewig Seligket.

Magister Johann Schlenß/ Pfarrer zu
Holsheim/ zu Boll/ bey dem
Wunderbad 29. Septemb.

A ij

8121

AB 154885 (M)





Der Durchleuchtigē
Hochgebornen Fürstin vñnd frawen/
Frawen Sybillen / Herzogin zu Württemberg vñnd Teck/
Gräffin zu Mümpelgart / Geborner Fürstin zu Anhalt/2c.
Meiner gnädigen Fürstin vñnd
Frawen.



Durchleuchtige / Hochge-
borne Fürstin / Gnedige Fraw: Wie
groß vñnd Manigfaltig die Wunder-
werck Gottes seyen / haben wir zu erler-
nen / nicht allein auß allen geschöpffen
vñnd deren würckungen / so den Mens-
schen offenbar: Sondern auch wir se-
hen vñnd erfahren täglich wie groß vñnd mildreich seine Ga-
ben seyen / in denen / so vor den Menschen verborgen in der
tieffe der Erden sind. Vñnd das ich vieler anderer / ja vnzal-
barer gutthaten / so er vns / als seinem ebenbild zutrost vñnd
nuß erschaffen / geschweige: Was sehen vñnd erfahren wir
doch täglich für herzlich vñnd wunderliche heilung allerley
schwerer frantckheiten / in dem von jr J. G. Gemahl / meinem
gnedigen Fürsten vñnd herzen / newlich erfundenen vñnd wol-
angeordneten Wunderbrunn zu Boll / in jhr J. G. Hero-
zogthumb Württemberg gelegen / geschehe? Also daß wir
freylich immerzu sprechen mögen vñnd sollen / das wunder-
barlich vñnd groß seyen die wunderwerck Gottes vor vnse-
ren

Vorrede

ren Augen. Dessen dann in diesem Tractetlein zusammen
gelesene Historien vnd vrfunden/ so da an jhr F. G. Vn-
derthanen/ vnder andern erwiesen worden / vns gnugsam
men schein für die augen stellen. Vnd ob ich gleich wol ers
melten wunderbrunn der lengenach fleißig/ vñ auff das als
ler trewlichst beyde in lateinischer vñ teutscher Sprach bes
schrieben vnd in ein Buch verfast hab (dessen dann das latei
nisch bereit in Truct außgangen:) Weil aber das Teuts
sche/ (welches auch jr F. G. von mir/ als billich/ dediciert vñ
zugeschriben worden) noch zur zeit nit hat können vollens
det werden: hab ich darumb nicht vnterlassen sollen noch
wollen/ hie vnden beschribene Historien vnd Vrfund/ von
allerley schweren Kranckheiten heylung/ so da im jekermel
ten Wunderbrunn/ vergangene beyde jahr geschehen / mes
siglichen zu nutz vnd gut in Truct zuverfertigen / vñ das
selbig jr F. G. Als meiner Gnädigen Fürstin vnd Frawen/
die vollkommene Teutsche Histori hierüber gewertig/ zuschis
cken vñ vnderthäniglich dediciere wölle. Genslicher hoff
nung vnd zuversicht/ es werde jr F. G. ein gnedigs gefallen
hierüber tragen / vñ der ganz Württembergisch ombkreiß/
ja auch andere vmbliegende Völcker / solches für ein sonde
re gutthat / vñnd so da auch zu ihrer gesundheit gereichen
möge/ halten vñnd erkennen. Gott der Almechtig wöll hies
mit E. F. G. sampt deren Gemahl./ meinem gnedigen
Fürsten vñnd Herzen / auch jungen Herren vñnd Frawen
lein / in langwiriger gesundheit vñnd fridlicher Regierung
erhalten / vnd des new erfundenen Wunderbruns / Krafft
vnd Würckung vielen Armen vñnd Krancken zu trost vnd
gesundheit stercken vnd bewahren. Geben zu Rumpelgarr
den 16. Hornungs/ im 1599. Jahr.

E. F. G.

Vnderthaniger vnd gehorsamer diener vnd Medicus
Ioannes Bauhinus D.



Historia

Der fürnehmsten Kranckheiten vnd

Bresten / welche an ankommenden Badgästen obseruiert worden / Vnd was ihr J. G. new erfunden / vñ statlich erbawet Wunderbad bey Boll / für operation vñ Wirkung wider gemelte Kranckheiten gehabt / So ich Ioann Rentzius bestelter Arzt daselbst / Von dem 26. Julij / bis auff den 15. Octobris / Anno 97. Auf J. be-
welch / mit guter Vrkund auffgeschrieben vnd
verzeichner hab.

In seßgemelter Badenszeit haben bey 200. Personen / so wol Außländische als ihrer J. G. Vnderthanen außgebadet / Sondere Casus vnd Exempla sein erschienen / In folgenden Personen / welchen man zum theil / wegen ihres abschewlichen ansichts / in gemeinem Badgewölbe / zu Baden nicht gestattet / sondern in ein besonder Badhürlein darzu gemacht / abgefündert hat / wie dann J. G. löbliche Badordnung außweyset.

Artlich mit Namen Thomas Kreuterer / seines alters ohngefähr von 20. Jahren / ein armer Student von Lamdsperg / auß dem Beyerland / der ist mit den Achoribus oder Achors da
der Erb-
grind vnd
Kand. Erbgrind / wie auch mit beissenden flechten vnd Rauden / durch den gansen Leib gleichsam vberzogen gewesen / vnd vber die massen abschewlich / daß ich anderer bösen innerlichen zustand des Leibs geschweige / Dieser ist innerhalb sechs wochen / widerumb glatt vnd heil worden / mit grosser verwunderung der Badgäst / die in ans
A iij fänglich

Vom Württembergischen

fänglich gefannt haben/ da er schon vorhin im Marggrafen Bad ohn einige hülff gebadet. Vnd hat solcher Student/ nach eingenomner guter kundschafft seines wolhaltens/ auff jr F. G. Kosten/ vmb Gottes willen außgebadet.

Mit gleicher armühseligkeit sein auch behafft gewesen/ Matthias Schmucker von Hausen bey Ehnigen gelegen/ ein Bawrs knecht.

Johannes Schweizer/ vñ Jacob Binder/ beede Jüngling/ so auß dem guten Leuthaus von Heilbrunn sich geschriben haben/ von den Herrn desselbigen orts gesandt.

Michael Mercklin von Stettē am Rampsthal gelegen/ seines alters etlichen 50. jaren.

Ein Knab von Stuttgart/ vmb 13. jar vngefährlich/ der Schnellen Marien Söhnlein genant.

Item ein Knab von Meissen auß dem guten Leuthaus gefand.

Johannes Schiker ein Mann vmb seine 40. jaren/ auß dem guten Leuthaus zu Stutgardt.

Johannes Mezger ein Bawrsman von Bernhausen auff den Fildern.

Diese seßgenannte seind alle widerumb gesund vnd sauber hinweg gezogen/ vnd haben diser etliche in 3. wochen/ etliche in 4. andere allererst in den 5. vñnd 6. wochen außgebadet.

Flechten
vnd truck-
ne Raud/
mit Füß
geschollen.

Anna Dalffingerin von Bernhausen ein alt Weib/ Vmb ire 80. jaren/ dise war auch mit Flechten vnd trucknen Rauden gleichsam durch den ganken Leib vberzogen/ hat darneben (weil beede Füß sehr geschwollen/ vñnd sehr spanten) ohn ein Krucken nit gehn können/ Ist solche Person in 6. wochen widerumb glatt worden/ vñnd wider gehn können/ mit jedermans grosser verwunderung.

Michael Locher von Ehnigen vmb seine 30. jaren ein Soldat/

dat / war ebenmäßig mit Flechten vñnd flüssigen Rauden flüssige Raud / Erbgrind vñnd Haar außfallen. scheusslich zugericht / Ist über dz sein Haupt mit dem Erbgrind / vñ Haar außfallen behafft gewesen / Diser ist innerhalb 6. wochen auch widerumb zur gesundheit kommen / vñ auch wegen mangel vñd armuth / auff jr S. G. Kosten vmb Gottes willen außgebadet.

Ulrich Kupff von Grödingen auff der Alp gelegen / diser ist auch mit einer bösen. Warzechtigen Rauden behafft gewesen / vñd schwarze heßliche Negel an Händ vñd Füßen gehabt / nichts destoweniger ist er innerhalb 4. wochen widerumb gesund worden / vñd mit freuden hinweg gezogen. Warzechtige Raud.

M. David Solimarus Pfarrer zu Bichberg / nicht weit von Schwäbischen Hall gelegen / war auch von Flechten Flechten vñd hitzige Raud. vñd hitzigen Rauden vbel zugericht / durch den ganzen Leib / Nach dem diser Ehrwürdiger anfänglich einlag 14. wochen / den Sawrbrunnen zu Rebehausen gebraucht / Ist er nachmals herüber in diß Wunderbad gezogen / dardurch er in 4. wochen zu guter vñnd frischer gesundheit gebracht worden.

Michael Nebelins Töchterlin von Neiffera bey Riedlingen / ist mit gleicher vn sauberkeit der Haut vbel zugericht gewesen / hat innerhalb 3. wochen auch ihr gesundheit widerumb erlangt / vñd dergleichen Exempel könten mehr angezogen werden / aber gemelte die fürnembste sein.

Appolonia Klingin von Geißberg / auß dem guten Leutshaus zu Stutgarten / etliche 50. jar irs alters / hat in beyden Füßen grosse vnheilsame Ulcera vñd schäden gehabt / mit Böse vnheilsame geschwür vñd schäden. grosser geschwür vñd schmerzen / so vber die 10. jar gewehrt / vñd nie weder durch die Wundarsnen noch anderer Bäder heil mögen werden / Solche Fraw ist innerhalb 5. wochen heil vñd geng worden / hat auch wegen armuth / vmb Gottes willen außgebadet.

Tieffe Lö-
cher vñ ge-
schwär.

Des Forstknechts Töchterlin von Sulbach bey Wer-
spach / war auch mit bösen tieffen Exulcerationibus / vñnd
lächern an Beinen / welcher vber die 20. jar gewesen / vbel
zugericht vñd hefftig geschwollen / ist jr innerhalb 3. wochen
geholfen worden / ohn anders zuthun / allein nechst nach
Gott / durch das Wunderbad.

Ein fres-
sung der
Nasen vñ
einem bö-
sen Krebs-
schaden.

Ein jungs Mensch / mit namen Agnes von Sielmin-
gen / auff den Bildern / nicht weit von Stuttgart / Jacob
Mauchen Tochter / diser Jungfrawen ist die Nasen mit
einem bösen vmbfressenden giftigen Krebschaden schier
gantz vñd gar hinweg gefressen gewesen / vñd hat offtermals
Holz Curen / vñd andere probierte gute mittel gebraucht /
aber dardurch nie sondern nutz gehabt oder gespüret / biß sie
dises Bad sechs wochen probiert / ist sie zu gutter besserung
des schadens gebracht worden / nit ohne sonderere verwunde-
rung der Badgäst.

Offner
schaden/
Erbgrind
vñ Krebs-
schaden.

Ein Knab von 14. jaren Martin Gerenhoh von Hei-
denheim / hat mit bösen offnen schaden am hindern gehabt /
wie auch den Erbgrind / vñ den Krebs an der Leffsen / ist di-
ser innerhalb 14. tagen am hindern gar heil worden / aber
wegen seines vnordenlichen badens / vñd böß Regiment im
essen vñd trincken / sonst geringen nutzen daruon getragen.

Hölscha-
den mit ge-
schwulst.

Barbara Mergenthalerin ein Jungfraw von Waiblin-
gen / hat am rechten Fuß / vornen am Knie ein bösen fistel-
schaden mit grosser geschwulst vñnd abfürkung der Gang-
adern / ein lange zeit gelitten / vñnd von keines Chur besse-
rung spüren mögen / biß sie endlich in diß Bad gezogen / da-
selbsten dann sie innerhalb 4. wochen / gute heilung vñnd
besserung / daran sie zu friden erlangt hat.

Michel Hausch seines alters vmb die 23. jar / von Teck-
welden / ein Schneider.

Johannes Seyß von Dunstetten.

Johannes Mannß von Blawbeyren.

Baltha

Balthasar Schmid von Zeinigen auff der Alp.

Dise habē auch wunder böse schäden an Füßen gehabt/ vnd können disen Wunderbrunnen / wegen erlangter guter besserung vnd heilung nit gnugsam loben vnd preisen.

Die Hoch vñ Wolgeborne Fraw / Fraw Apollonia Gräwin vñ Helffenstein / geborne Gräwin von Zimbern / Fraw zu Wildenstein / vnd der Graffschafft Rößkirch / hat mit ir etliche arbeit selige / arme bresthaffte Personen gebracht / vñ vnder disen ein Jungfraw / vñ etlicher 20. jaren / des Kempins Tochter von Neiffera / zwischen Riedlingen vñ Siengen gelegen / genant / welche vnden an des lincken Fußfersen / gegen dem Zehen / einen beinschretigen bösen giftigen schaden / vber die 6. jar gelitten / vnd vergebentlich auff die Balbierer grossen Costen gewendet / Nach dem solche ein wochen zwo gebadet / sein nit allein etliche beinschreth / sondern auch ein langer schwarzer Wurm auß dem schaden kommen / von welcher zent an widerumb fleisch gewachsen / vnd endliche heilung gefolgt / also daß sie in den 6. wochen / widerumb auff den Fuß fecklich treten vnd gehn können.

Giftiger durchfresender schaden mit dem Wurm.

Georg Hauser Burger zu Boll / ist am ganzen Leib / sonderlich an Händen vñ Füßen hefftig geschwollen gewesen / vñ vber das mit einer beissenden Rauden vnd Krez behafft / aber innerhalb 3. wochen / widerumb heil vñ gesund worden / vñ weil er arm / vñ seiner redligkeit gute zeugnuß gehabt / ist im gnugsame vnderhaltung vnd Narung / zu vollkommenen außbadung / gereicht worden.

geschwulst des ganzen Leibs mit beissender Raud.

Catharina Sandereckerin von Blm / ein Weib vmb ire 50. jaren / ist in das Wunderbad geführt worden / an beyden schenckeln lahm vñ hefftig geschwollen / neben einer beissenden flüssigen Rauden / hat sich mit diser Person zugetragen / daß sie innerhalb 3. wochē von irer geschwulst / Rauden vnd schmerzen erledigt worden / vñnd widerumb zimliche bewegnuß auch bekommen.

Lahme Schenckel mit geschwulst vñ Raud.

B ij Jacob

Groß geschwolne
ölschenckel.

Jacob Hierumb von Dürren jetziger zeit Burger zu Heilbronn/ hat groß geschwolne ölschenckel gehabt/ welche er innerhalb 3. wochen augenscheinlich hat sehen abneimen/ vnd gute leichterung im gang gespürt.

Brustfranchheiten.

Sonsten haben sich auch bey disem irer F. G. Wunderbad etliche gefunden/ so mit Brustfranchheiten behafft gewesen/ vnnnd sonderlich ein Burger von Stutgart/ seines Handwercks ein Beck/ der Karsß genant/ welcher vil jar her gar engbrüstig gewesen/ vnnnd offtermals ersticken wölten/ von disem seinem anligen/ hat er nie können durch ordentliche mittel curirt werden/ biß er diser Bad besuchet/ hat er in wenig tagen gute besserung bekommen/ vnd in auffgewendter Kost nit gedauret.

Lungensucht mit schwerem Husten.

Ulrich Helderlin von Nürtingen/ ein junger Balbierere Gesell/ hat lange zeit einen bösen Husten an sich befunden/ also das er von Doctoribus Lungensichtig geachtet worden/ hat er durch mein rath disen Wunderbrunn gebraucht fast auff ein Monat/ alle morgends vier vnß/ warm/ zu andern zeiten aber kalt/ allein oder mit Wein vermist/ nach seinem gefallen getruncken/ hat also seines hustens tägliche lieferung befunden/ biß er endlich gar gesund worden vnd verblieben ist.

Maria eins Schaffhirten Weib von Bonlanden/ welche auch Lungensichtig/ hat disen Wunderbrunn/ mit solcher lieferung gebraucht/ daß sie nach etliche wochen wider schaffen vnd irem thun außwarten können.

Brustgeschwâr mit Blutspey. geschwulst des bauchs vnnnd der Füßen.

Deßgleichen Johannes Koch von Pfaffenhofen/ auß dem Beyerland/ ein Müller/ hat sich an der rechten seyten der Brust/ da er ankommen/ hefftig beklagt/ vnd stetigs gehustet/ auch Blut außgeworffen/ neben dem das er auch geschwollen gewesen/ am Bauch vnd Füßen/ ist in 4. wochen widerumb frisch vnd gesund hinweg gezogen.

Marx

Marr Kraußhaar von Ober Emsingen / Nürtinger
ampts/ seines alters bey 60. jahren/ hat sich lange zent einer
grossen blödigkeit/ vnd schmerzen des Magens beklagt/ ist <sup>Magen-
weh.</sup> in furzer zent von seinem anligen erledigt worden/ vnd gu-
te besserung erlangt.

Ein Geelsüchtiger Mann von Ehingen / seines alters ^{Geelsucht.}
etlichen 50. jahren/ ein Beck/ welcher auch ein groß geschwol-
len Milz/ vnd andere böse zustendt gehabt / ist in 14. tagen <sup>geschwulst
der Milz.</sup> widerumb dauon erlediget worden / vnd zimliche gesund-
heit erlangt.

Der Pfarherz von Rohwelden/ M. Georgius Binder/
hat wider sein langwürdig Hüftweh vnd reissend Gesücht ^{Hüftweh.}
an eusserlichen glidern gebadet/ ist ime wol bekommen / Des-
gleichen auch Pfarrer von Umbden Kürcheimer Bog-
ten/ hat mit ime in Gesellschaft wider die Fluß gebadet/ vñ ^{Fluß.}
sein dise beede Ehrwürdige Herrn/ die jenige gewesen/ so im
gemeinen Badgewelb einen glücklichen anfang gemacht/
welches ich Ehrenhalben zu melden nit sollen vnterlassen.

Johann Vischer ein Burger von Nörttingen wel-
cher gar lang vnd hefftig von dem Zipperlin auch Hüft- <sup>Zipperlin
vnd Hüft-
weh.</sup>weh geplagt / diser ob er gleichwol vil herlicher mittel ge-
braucht / doch nichts helffen wollen / als er mich raths ge-
fragt/ hab ich in erstlich purgiert/ vnd demnach dis Wun-
derbruns Wasser zutricken gerathen. Davon er dann so
vil besserung gespüret vnd erfahren / als jemals von keiner
andern Arzney / vnd lobt dis heilsam Wasser vberaus
nach täglich.

Huldrich Balk Burger zu Oberensingen der Brus-
benherdt/ von 60. jahren/ als er lang vom grimmen geplagt/
ist endlich lam an beyden Armen worden. Vnd ob diser <sup>Lähme an
Händen
vom grim-
men.</sup>gleichwol vergangen jar das Wildbad gebraucht/ hat es in
doch nichts geholffen. Endlich hat er meinen rath nach di-

sen Wunderbrunnen gebraucht / davon im wunderbarliche hülff widerfahren / also daß er die Hand wol gebrauchen konnte / auch sonst im ganzen Leib gesunder vnd stercker ist worden / als er zuvor war.

Trieffen
der Augen.
Krampff. Eben diser ist vom trieffen des rechten Augs / auch vom Krampff der schencklen / von welchem er lang vexiert war / glücklich vnd wol geheilet worden.

Böse giftige Raub. Ein junger Gesell von Brackenaw / welcher mit einer bösen giftigen Raub den Frankosen gleich geplagt war / vermeint diß jar in disem Bad ganz vnd gar heil worden zusein. Da er doch vorhin etlich mahl das Holzwasser ohn sonderlichen nutz gedruncken.

Barbara Mellingerin von Kiedlingen / ihres alters 50. jar / hat wider das Grief vnd Huffweh / auff der Bräun von Helffenstein Costen außgebadet / ist jr vber die massen wolbekommen / wie nit weniger auch der Teutsch Schulmeister von Winterbach / so gute miltierung gespüret hat.

Lähme. Balthasar Kopp von Blawbenren / seines alters vmb die 30. jar / ein Büchschessfer / ist an Hand vnd Füßen Contract gewesen / aber nechst nach Gott / durch disen Wunderbrunnen / innerhalb 3. wochen / widerumb gute besserung vnd bewegnussen empfangen / Vnd diß ist vor 2. jaren geschehen / Vnd nach dem er vergangnen jars / widerumb ein neigung zu voriger Kranckheit vnd zitterkeit empfunden / ist er wider ankommen / vñ abermals zu sterckung vnd präseruation / das Gelt wol angelegt.

Catharina von Zeißkeim / ein Edle Jungfraw / auß dem freyen adlischen Stiff Oberstenfeld / hat zu verhütung der Lähme / vnd andere böse zustend / diß Bad auch besuchet / vnd ist mit guter benügung vnd gesundheit wider hinweg gezogen.

Obser-



Obferuationes

Vnd gründliche einfältige beschrei-
 bung der fürnembsten Kranckheiten vnd Gebrechen / dar=
 für das Wunderbad bey Boll geholffen vom 20.
 Aprilis biß auff den 7. Octobris
 Anni huius 1578.

Summa aller Badgest. — 364.

DEn 20. Aprilis hat dem Baden einen glücklichen
 anfang gemacht / Steffan Schellkopff von Chür=
 naw bey Boll / seines alters 52. jar / geschwollen am
 ganken Leib / sonderlich an Händ vnd Füßen / vnd gleich=
 sam auffgeblasen / hat darneben solchen kurzen Athem ge=
 habt / daß er schier alle dritt müssen niderfizen vnd ruwen
 mit grossen vnnatürlichem durst / vnlust zum essen vñ der=
 gleichen andern mehr bösen Symptomatis vnd Zusten=
 den / so die Wassersucht mit sich bringt. Vñ hat diß sein an=
 ligen vñ beschwerliche Kranckheiten / durch den ganzē Win=
 ter gewerth / sampt einer bösen giftigen Krez vñ flüssigen
 Kaudē. Nach dem nun diser Badgast mit dem baden auch
 den Wunderbrunnen morgens warm / vñnd den tag hin=
 durch kalt / nach durst gedruckē / ist er anfänglich dardurch
 hefftig purgirt worden / an der Haut starck außgeschla=
 gen vñnd geschwist. So bald solches geschehen / hat der
 Kranck sich vmbß Herß schon vil leichter entpfunden / die
 geschwulst von tag zu tag abgenommen / die Krez geheilt /

Wasser=
 sucht vnd
 langwiri=
 ge böse flüs=
 sige Kaud=
 den.

B iij vud

vnd in summa bald widerum zur gesundheit gebracht worden / darfür er nit groß Gelt noch gut nemmen wolte / den sonst kein Arzney mittel helfen möge. Solte aber dise Person zu mehrer bestendigkeit / lenger gebadet haben / hat nicht folgen wollen.

Langwiri-
ge grimmen
vñ Wärm
Kranckheit /
mit flüssige
Kauden.

Leonhard Koch von Boll 40 jar seines alters / hat gebadet für ein Leibs schmerzen / so er lange zeit reuerens zu melden / vmb den Nabel vnd Hindern außgestanden / daß auch der tenesmus oder zwang gefolgt / welcher auff ein zeit daß intestinum rectum oder Maßdarm heraus getriben / mit sorgen / daß nicht etwas schwerers folgte / vnd wie diser den schmerzen selbs beschriben / hat es in immerdar vmb den Nabel vnd gemelte orth gebissen vnd genaget / Für dis nun sein beschwerlich anligen vnd schmerzliche Kranckheit / hat er wie obengemeldet ein wochen 3. gebadet / vñ den Wunderbrunnen gedruncken / ist dauon per sedes purgiert worden / vnd ein grosse menge kleiner brauner Würmlein von arzney gelerten genandt Aslatides von im kommen / von dannen hero er ruhig gehabt vñ wider angefangen schlaffen / daß essen vnd drincken ime wol geschmeckt / vnd in summa zu guter gesundheit gebracht worden / darfür er Gott dem allmechtigen lob gesagt / vñ allen den jenigen / so dis heilsam Wunderbad erfunden.

Diser Person ist an der Kranckheit fast aller ding gleich gewesen / Hans Plenniger von Zell / welcher dis Bad nunmehr etlich malen gebraucht vnd bekennet rund / daß er dadurch sein auffenthaltung wegen böser giftiger Kauden drin er sonst lengerst außgeschetzt / vñ als auffesig von andern reinen Leuten abgesündert worden.

Dreyflins
harnē vom
Stein-
schneiden.

Steffan Schmidts Sohn von Langenaw bey Ulm geslegen / ein Knab vmb seine 16. jar / nach dem er von jugend auff / grossen vnträglichen schmerzen am Blaasenstein gelitten /

litten vnd kein Arzney mittel helffen wollen/haben in seine Eltern am Calculo schneiden lassen/vnd zwar zum andern mahl/dardurch der gut Knab das wasser nicht mehr halten können / sondern vnder sich dreyflinsweiß lauffen lassen/welches den Eltern vber die massen vil bekümmernuß gebrach. Darvñ in den sein alter Vatter mit sich ins Wunderbad gebracht vñd neben sich baden lassen / sihe hat das Badwasser so er gedruncken/in nicht allein per sedes hefftig purgiert/ sondern auch den Harn vñ Sand/durch die Vesicam oder Blasen getrieben/ dauon der Knab vmb den Blasen hals schmerzen bekommen vnd geschwollen/welche gesch.vulst in dermassen in wenig tagen apostemifirt worden / vnd durch Suppuration der Callus am vngeheilten schnittlechlin erfrischt / also daß der Knab am 12. tag seines badens dran heil worden / vñd widerumb mit grosser verwunderung durch den meatum vrinarium oder Röhrlin natürlicher weiß anfangen zu harnen / vñd nachmals zu mehrerm b stand noch ein tag 10. gebadet / endlich mit seinem alten Vatter so wider flüssige Augen vnd blöd gesicht mit guter besserung gebadet / frisch vnd gesunde heimgezogen/darüber sich meniglich verwundert.

Augenfluß
vnd blöd
gesicht.

Hans Weber von Zell der Daubenhensin genannt/seines alters vber 40. jar / hat für sein langwirig beschwerlich anligen der Wassersucht / so vber ein jar lang gewerth / vnd jme hefftig zugesetzt / gebadet vñ den Brunnen noch badens gewonheit warm vñd kalt gedruncken nach durst / hat jme mit hilff vñd bestand Gottes / solches Bad innerhalb 4. wochen auch geholffen / daß er jetzt wider wol auff ist / schmecket jme essen vnd drincken widerumb wol / vñd kan seinen geschäften wider obligen. Ist durch den Wunderbrunnen dapffer per sedes purgirt worden / zweymal an der Hand außgeschlagē / hefftig geschwurt / von welcher zeit an / s mit jme anheben besser werden.

Wassersucht.

Steffan

Flüssige
böse Nauden mit geschwulst vñ schmerzen der Füß.

Steffan Breisch von Bempfflingen/ Bracher Vogten seines alters 43. jar/ hat ein giftige langwirige Krez vnd flüssige Nauden an beyden Schenckeln / neben vnstätlichem grossen schmerzen vnd gewüth / lange zeit aufgestanden / vñnd wie ers beschriben / hab es nicht anders in seinen Schinbeinen gethan / als wenn Nadel vñnd Klussen darinnen stecken / Für diß sein schmerzlich anligen / nach dem er ein tag 10. gebadet / vñnd wegen einfallender Constipation des Stulgangs vnd strengen badens / ist er in ein Fieber gefallen / vñnd wider wollen heimziehen / hab ich im zugesprochen vnd die Axungiam Lunæ 2. welche für purgierung der gemeinen Badgäst angeordnet / mit dem purgierenden Rosensafft im Wunderbrunnen eingegeben / ist es von stundan mit ihme besser worden / vñnd mit dem baden wider fürgefahren / hat sich die sacht also von tag zu tag gebessert / daß er an der 4. wochen heil frisch vnd gesund heim gezogen / wolte nit groß Gelt darfür nehmen.

Langwirige Geelsucht vnd Wassersucht.

Alle Hornecker von Kirchen vnder Teck Weyland Burgermeister / seines alters ober die 71. jahr / ist diser mit langwiriger Geelsucht / Geschwulst vnd beissenden wilden Nauden übel zugericht gewesen / vñnd darfür ein wochen 4. gebadet / vñnd den Wunderbrunnen getruncken / hat Gott die Gnad geben / das ihme geholffen worden / vñnd bishero noch guten bestand gehabt / kans nit gnugsam loben / vñnd Gott für so heilsams Bad dancken / mit öffentlicher bekantnuß / daß er zwor sein tag vil Bäder besucht / aber solche Krafft vñnd Wirkung an keinem gespüret vñnd erfahren.

Giftige geflecht an Füßen auß verhaltung der Noßnarzeit.

Balthas Mayers Hausfraw von Nürtingen / ihre alters etlichen vierzig jahr / nach dem sie vor zweyen jaren / ihre Nenses verlohren / ist nachmals das Rothlauff ihr an beyde Schenckel kommen / vñnd hefftigen prurimum vñnd beissen

beissen daran verursachte / darauff die Schinbein angefangen zugeschwollen vnd auffbrechen / vnd vmb sich gefressen mit grosser brunst vnd wüthen / vnangesehen aber diese Person raths gefragt bey Doctorn vnd Balbierern / ist sie endlich ins Wunderbad kommen / vnd d vber die vier wochen fleissig gebadet / dauon zu guter gesundheit gebracht worden / dafür sie nit groß Gut vnd Gelt nehmen wolte / wens bestand solte haben / wie es dann haben wirdt / ob Gott wil.

Balthasar Greiner von Plienspach / Göppinger Bogtey vmb vierzig jahr seines alters / hat disz Bad auch ein wochen drey besucht zur präseruation gwisser Blutesssen vnd geschwär / welchen er vil jahr hero vnderworffen gewesen / vnd in offtermals dermassen erkündet / das er vermeint er müsse dran sterben / hats hoch bedeuwret / das er innerhalb 3. jahren / vber die 300. Eysen an seinem Leib gehabt / doch hat er auch darneben vil am Huffwehe erlitten vil jar hero / wider vnd für disz sein anligen hat diese Person wie oben gemelt / auch gebadet vnd sich dauon gar wol am Leib befunden / vñ sene solches das ander mal das ers gebraucht / vnd könne dardurch die Bomicas oder Eysen / wie ers nennet / wie nit weniger auch das Huffwehe präseruieren vnd verhüten.

Sür Blutesssen vnd Huffwehe.

Hans Greiner von Plienspach 40. jahr alt / wie er anzeigt / hat er lange zeit ein lehme vnd vnentpsindligkeit an der lincken Seiten ab vnd ab entpfunden / als wenn im immerdar Arm vnd Schenckel entschlaffen / dardurch er denn an seiner arbeit vnd schaffen verhindert worden / hat wider jetztgemelte Symptomata vnd böse zustend gebadet / mit guter besserung / dafür er auch nit vil gelt dafür nehmen. Sonderlich sene ime das Rothlauffen so auffsetzig / hab disz Bad schon zweymal heim holen lassen zu trincken besinde es auff das heilsambst dafür.

Entschlafung der linckē Seiten / auch Arm vnd Schenckel.

E ij Zeiger

Langwiri-
ger Schmer-
zen vñ ge-
wüch an
Arm vñnd
Schēckeln.

Zeiger Kleinbach von Pliemspech 52. jar seines alters/
hat gebadet für sein langwirigen schmerzen an arm vñnd
schenckel/welcher hin vñnd wider laufft/reiß vñnd wüthe/vñnd
haben ihn die Fersen oder Solen so hefftig gebrennt/ daß er
mit anders vermeint / als er trette auff fewrige Kolen/ solch
vngewitter wie ers genant / hab er im Marcß vñnd Bein
lange zeit gehabt. Ist auch diser Person das Bad gar wol
bekommen / vñnd sein schmerzlich anligen dardurch hinweg
gangen/hat diser auch die Axungiam Lunæ 2. zuor purgie-
rung eingenommen ein Vnguentum ex althea cum oleo
Vulpis & therebinthinæ zuor schmürung / nach dem Bad
gebraucht vñnd ime wol bekommen.

Langwi-
rig hufft-
weh vñnd
schwach-
heit der
Fuß.

Jacob Schwarz von grossen Bettlingen / mittelmässi-
gen alters / ist lange zeit einhero mit alter langwirigē hufft-
weh vñnd schmerzen behafft gewesen/ dermassen das im dar-
von die Gangadern zu kurt worden/vñnd nit mehr gehn könn-
nen/ wider diß sein beschwerlich anligen / hat er ein wochen
3. gebadet / vñnd den Sawrbrunn darneben gedruncken / ist
nicht allein der schmerz dardurch gemiltet vñnd verdriben
worden / sondern auch mit hülff eines Geederfäblins ex
Vnguento Alabastrino & oleo Lumbricorum compo-
sito, daß weiß geeder also gesterckt worden vñnd corroborirt/
daß er auch selbs widerumb heim zu fuß gezogen / vnange-
sehen dise Person zuuor etlich malen das Wildbad besucht
vñnd darin gute zeit geblieben / aber hab solchen nutzen / wie
von diesem Bad/nit schepffen können.

Offner öl-
schenckel.

David Glockh von Westerheim bey Wisensteig/ seines
alters nach bey 30. jaren/ist ins Wunderbad kommen/ mit
einem vberaus dicken ölschenckel / daran er vnseglich gros-
sen schmerzenhaber die 9. jar außgestanden/ hat auch hefftig
geflossen vom gelben stinckendem Wasser/ dermassen/ daß/
wenn er allererst ein strumpff angethon / seye er gleich vol-
sen

len Wasser worden / hat der vrsachen halben / bey ehrlichen Leuten schier nit mehr dörffen sehen lassen / Solcher Schaden hab vor 9. jaren sein vrsprung gehabt von einem Kochlauffen / welches er bekommen bey einem Meister / welcher in vberfelt einem Mutterpferd nach / so wild gewesen vnd den Rossen nach geloffen außgeschickt / hab er sich durch strenges lauffen dermassen erhiziget / vnd eys kalt Wasser drauff eingesoffen / daruon sey der Fuß geschwollē / außgebrochen / vnd solches sein anligen erwachsen. Vnangesehen aber dise Person vil mittel versucht / vnd zuvor auch ein mahl im Marggraffen Bad gewesen / war doch alle mühe vñ Costen vñ sonst. Aber in disem Bad hat Gott die gnad geben / daß er innerhalb 5. wochen widerumb heil worden / vnd die geschwulst des mehrertheils vergangen / mit verwunderung meniglich / so ihn vor dem Bad bekandt gehabt / wolte nicht des Keyfers gut dafür nehmen / denn er weder tag noch nacht kein ruh w gehabt / vnd sein Brod nit mehr gewinnen können / wolte lieber gestorben sein / denn also arbeitselig leben. Zu mercken das diser auch zu vnderscheidlichen mahlen durchs Wasserdrincken hefftig purgirt worden / außgeschlagen vnd geschwilt / hab disem auch nach gehabter reinigung des Leibs / den ölschenckel an etlichen orthen schrepffen lassen / vnd die Brandader eröffnen / welches ihme augenscheinlich wolbekommen / doch mit der vermanung / daß er fürto zur präparation / das vberflüssig Geblüt / vom obertheil des Leibs / durch Aderlaß vñ schrepffen außziehen vnd mindern solle / wie nicht weniger auch zu Frieling vnd Herbstzeiten / mit rath der Doctor den Leib purgieren.

Hans Hagenloch von Dffterdingen / seines alters etlichen 60. jar / hat ein mercklichen bösen vhralten Wolffs-^{Alter}schaden am rechten Schinbein gehabt / auch vom Rath-^{Wolffs-}schad am Schin-^{Schin-}bein.
 C iij lauff

lauff verursacht. Diser Schad ist durchs baden innerhalb
drey wochen mehrertheils zugeheilet mit grosser verwun-
derung jedermenniglich / welches dem Patienten selbs gar
frembd geduncket anzeigend / er habe vil Vader in disem sei-
nem anligen nun mehr vber die zwölff jahr hero besucht / a-
ber nach nie feins angetroffen / welches so stark vnd kräft-
tig gewesen sey / in heilung seines Schadens. Vnd weil dis
sein vlcus vnd Schad so lange zeit gewehrt / von einem
strengen Leibflusz verursacht / hab ich vollkommene Con-
solidation vnd heilung widerrathen mit vermelden / das
er das vberig was noch offen / solle an stath einer Fontas-
nellen behalten / es möchten sonst andere franckheiten bey
ime ausbrechen.

Langwiri-
gig Angē-
wehe vnd
blöd Ges-
sicht.

Anna Wilhelm Tassen Hausfraw von Seningen etlis-
chen 40. jar jres alters / ist vil jar hero mit grossem Augen-
schmerzen vnd blöden Gesicht beladen gewesen / vnd verge-
bentlich vil vnd mancherley arhney mitteln / von Augen-
arhent vnd Doctores versucht. Hat dise Fraw auch geba-
det ein wochen 3. vnd dardurch bald linderung jres schmerz-
gens bekommen / mit offentlicher bekantnuß / das sie len-
gerst vmb ire Augen kommen wäre / wo sie nit solches Bad
als der besten Collyriorum vnd Augenwasser / eins hette
bey der hand gehabt.

Offner gif-
tiger Schad
am Schin-
bein.

Sebastian Keyer von Dettigen vnder Brach / seines al-
ters etlichen 50. jahr / hat auch einen bösen alten Schaden
am Schinbein gehabt etlich jar lang / vom Rohlauff caus-
sirt vnd verursacht / durch die Wundarhney beshero nicht
können heil werden / aber durch das Wunderbad innerhalb
18. tag sein Vlcus vnd Schaden zur guten Consolidation
vnd heilung gebracht. Ist durch den Wunderbrunnen den
er getruncken / dermassen purgirt worden / das auch das hel
Blut hernach geloffen / auch zu vnderschiedlichen mah-
len.

len an der Haut außgeschlagen.

Martin Egen von Dettigen vnder Brach / hat auch einen sibenjäh-
 rigen off-
 welcher in wie ein Feuer vnd glüwig Kolen gebrennt / vnd
 solcher schmerzen verursacht / daß kein Ross oder Esel kön-
 nen außstehn. Für diß sein anligen vnd gebresten / hab er
 ein mahl daß Wildbad versucht / wie auch das Seurbad
 bey Owen zwar mit gutem nutzen vnd heilung des Scha-
 dens / aber er befinde in der warheit / daß dises Bad mehr in
 8. tagen zuheile / als die jenige in 14. tagen. Ist diese Person
 innerhalb 4. wochen / fast aller dings heil worden.

Georg Schweicker von Schleitdorff / nach bey 50. jah-
 ren seines alters / hat vor 7. jahren in einer Steingruben
 geschafft zu Winters zeiten / sihe ist ihn vrbloßlig oben am
 rechten Arm auff der Achsel / ein stechen ankommen / wel-
 ches durch den gansen Arm bis zu den Negeln vnd eusser-
 sten Finger hinaus gangen / von dannen sey der schmerz
 in linken Arm kommen / darnach durch den gansen Leib
 gewandert / also das kein Gleich im gansen Leib sey / wel-
 ches solcher Fluß mit durchsucht / hab dauon das weiß Gees-
 der in Arm vnd Schenckeln zusammen gezogen vnd ab-
 fürst worden / wider diß sein schmerzlich anligen / hat diser
 gut arm zwar vilerley mittel gebraucht / aber die sachen da-
 durch nur erger worden. Vor 2. jahren sey er im Wildbad ge-
 wesen darin er ein tag 14. gebadet / aber nichts geholffen daß
 er spüren könne. Nach dem er nun vernommen daß diß Bad
 für dergleichen fluß vnd franckheiten solle heilsam vnd gut
 sein / ist er auch kommen vnd ein wochen 3. mit baden zuge-
 bracht. Hat Gott die gnad geben das jme das Bad wol bes-
 kömme / der schmerz vergangen / vnd die Glieder widerumb
 wunderbarlicher weiß außgestreckt vñ gesterckt wordē / mit
 guter tröstlicher hoffnung / es werde das Wunderbad auch
 gute nachwirkung erzeigen.

E iiii Anna

Anna Peters Finden Hausfraw von Kirchen vnder
 theck/mittelmässigen alters/nach dem sie vor vil jaren lang
 wirigen schmerzen vñ pein außgestanden / vmb die Lenden
 am Griech / sein ihr die Fuß von tag zu tag so lahm vñnd
 schwach worden / daß sie endlich allein nit mehr gehn könn-
 nen/sondern entweder an einen stecken sich steiren/oder von
 einem andern geführt werde müssen/wie sie den also arbeit-
 felig ins Wunderbad gebracht worden. Hat wider diß jren
 beschwerlichen zustand vñd Kranckheit gebadet / bey 3. wo-
 chenlang / vñd am 10. tag schon widerumb allein ohn Kru-
 cken vñgeführt auß vñd ein steigen/ vñnd wo sie hin begert/
 gehn können mit verwunderung jederman / wolte nit groß
 Gelt vñd Gut dafür nehmen.

Thomas Schauchers Tochter von Hochstettē ob Blm/
 jres alters etliche 20. jar / ist mit einer abscheulichen vnärtiz-
 gen wilden vñd giftigen Gesechten vñnd Krep / oder wie
 mans nennet einer flüssigen Malacey behafft gewesen/vor
 2. jaren in der Kindbet / durch starcke hitzige Getrenck vñd
 Wein also verderbt worden. Vñd wie wol sie i. a. einer star-
 cken holz Cur gelegt worden / hat dannoch kein heilung fol-
 gen wollen / sondern alles erger worden. Des halbē sie wider
 raths gefragt bey einem Doctor zu Lauwingen/welcher ihr
 ins Wunderbad gerathen/welchem sie gefolgt / vñnd nach
 bey 5. wochen lang gebadet / dauon sie solche besserung er-
 langt / daß sie nit allein innerhalb 14. tag widerumb allein
 vñgeführt gehn lehrnen / auch die stegen auß vñd ab steigen
 können (da man sie zuvor wegen schwachheit vñnd dieffen
 Spelten oder Schründen / so sie an Arm vñd Schenckeln
 gehabt / tragen heben vñnd legen müssen) sondern auch an
 der Haut wider heil vñd rein worden. Allein hat sich der
 fluß im Kopff vñd Angesicht nicht aller dings ergeben wöl-
 len / weil dise orth daß Badwasser im Zuber nit wol erlan-
 gen

Lähme vñ
 schwachheit
 der Fuß vñ
 Lenden/
 auß lang-
 wirigen
 Lenden-
 weh vñd
 Griech.

Außsetzi-
 ge Hautē
 vñd Erb-
 grund/auch
 abnehmen
 Des gan-
 zen Leibs.

gen können/vnnd sie gebürlichen fleiß mit dem neken vnnd
zwagen nicht anwenden lassen/ wie disem allem/ ist sie dar-
mit wol zu friden gewesen / vnd sich weder Costen nach ar-
beit des badens gedauren lassen.

Hans Voller von Kemningen / mittelmässigen alters/
zeigt an/ daß er nun bey 6. jar hero/vil Fieberische Kranck-
heit außgestanden/vnd dardurch in die schwarz Geelsucht/
geschwulst der lincken Seiten vnd des Milkes / böse flüssi-
ge Rauden / vnd dergleichen andere böse zustend gerathen/
darfür er das Wunderbad zugebrauchē willens / vor 2. jarn
seye er im Marggraffen Bad gewesen / darinnen er wenig
nutzens empfangen / hab auch sonst kein mittel helffen wol-
len. Gott hat gnad geben/ daß disem Mann das Bad wol-
bekommen / hat 4. wochen lang gebadet auff jhr J. G. Co-
sten vmb Gottes willen frisch vnd gesund widerumb heim-
gezogen/ ist hefftig purgiret worden durch das Wasser/ vnd
an der Haut hefftig außgeschlagen vnd geschwitzt / vñ wel-
ches er sonderlich gezeigt hat / das Badwasser jme dē Harn
getriben / vnd so zu tags / so zu nachts offtermals reuerenz
zu melden/zur Rachel genötigt.

Schwar-
ze Geel-
sucht/vnd
flüssige bö-
se vnärtige
Rauden
am ganzen
Leib.

Michael Beck von Hedelfingen/mittelmässigen alters/
hat ein offnen bösen giftigen schaden am rechten Fuß vn-
den am innern Knoden gehabt/ vnnd hefftig geflossen/ von
gelbem beissenden Wasser vnd feuchtigkeit/ welche ober die
massen sehr geschmirzt / vnd habe vil jar her gewehrt / vom
Kotlauffen anfänglich verursacht / vor etlich jaren hab er
auch Marggraffen Bad versucht / welches jhme zwar wol
bekommen / aber bald widerumb mit ihm ombgeschlagen/
Hat für diß sein anligen ein wochen 3. mit allem fleiß geba-
det/vnd dardurch nicht allein sein Schaden geheilt/ vñ den
Fluß außgetrücknet / sondern auch sonst an seiner Leibs-
gesundheit gute besserung (den er der Geelsucht vnderworff
D fen

Offner
schad am
Schinbein
neben der
Geelsucht.

fen gewesen) bekommen / hat darneben die Acidulas oder
Sawrbrunnen getruncken / von wegen grossen dursts / so
der Wunderbrunn verursacht.

Offne scha-
den vnd le-
cher an fü-
ssen sampt
einem 15.
jârigen
Husten.

Stoffel Burchen Meyer von Schornbach / seines alters
vber die 50. jar / hat etlich jar hero böse fressende dieffe lecher
vnd Ulcera an beyden Füßen / hin vnd wider gehabt / deren
vber die 30. an der zal gewesen mit grosser geschwulst vnd
schmerzen / dardurch er sehr gepeinigt worden / vnd weder
tag noch nacht kein ruw gehabt / Sein solcher giftiger Na-
tur corosorisch gewesen / wie ich selbs mit Augen gesehen /
daß sie ins Schinbein lecher gefressen / darein ein Hasel-
nuß gelegt mög werden vnd nach dieffer / hats bißhero nie-
mand können heilen / nichts destoweniger sein solche Ulcera
vnd schaden volkommendlich dißmals im Wunderbad
zugeheilet / mit grosser verwunderung jederman / vnd sol-
ches innerhalb 4. wochen. Vnd hat dise Person sonderlich
den Wunderbrunnen gerühmt / wider einem vralten hu-
sten / den er an sich gehabt / glaubwürdig nach bey 15. jaren /
denn ehe vnd dann er ins Wunderbad gezogen / hab er das
wasser heim gehn Schornbach führen lassen / vnd nach durst
getruncken / er wisse nit wie er darzu lust bekommen / hab eben
hören sagen es sey so ein siess wolgeschmeck lieblich Wasser
zu trincken / wider alte langwirige Husten vnd Brust-
franckheiten / zeigt doch an das ime der Hust vnd engbrü-
stigkeit grösser worden / biß er Blut vnd Eyer in grosser
meng außgeworffen / da hab er sich von stund an vmb die
Brust wol entpfunden / seye der Hust vergangen der ge-
stalt / daß er jekunder wider möge wol essen schlaffen vnd
schaffen / darsür er Gott dem allmechtigen zum fürdersten /
wie auch nicht weniger den jeningem / so solch heilsam fest-
lich Bad erfunden / nicht gnugsam lob vnd danck sagen
können.

Herz

Herz Pfarrers Hausfraw von Steinenkirch bey Witz
 gelegen eines mittelmäßigen alters / hat ein wochen 4. ge-
 badet vnd den Brunnen getruncken / für ein alts langwi-
 rig Lendenwehe / geschwulst vñ reudigen bösen Fluß an bey-
 den schenckeln / vnd hat jr die schwarze Geelsucht vil jar hero
 groß vbertrang angethan / vñ ob sie gleichwol raths gefragt
 bey den Doctoribus / vñ zwey mal den Gesundbrunnen zu
 Blm / wie nit weniger auch das Geißlinger Bad der Kei-
 telbrunnen genaht / besucht hat / dannoch wie sie angezeigt /
 nichts fruchtbarlichs mögen erbadet / aber im Wunderbad
 da sie kaum 8. tag mit badē zugebracht / hat sie augenschein-
 liche besserung entpfundē / ist der Athem vñ das Herz leich-
 ter worden / der schmerz gelindert vñd vergangen / die ge-
 schwulst vñd flüssige Kauden abgeschafft worden / darfür
 sie nit groß gut nach gelt nemmen wolt. Ist durchs Bad-
 wasser / welches sie warm getruncken hefftig zu vnderchied-
 lichen malen purgiert worden / außgeschlagen / geschwitz vñ
 das noch mehr ist / hat es vil sands vñd vnraths durch die
 Blaasen von jr getriben.

Alt lang-
 wirig Käu-
 ckenwehe /
 mit bösem
 flüssigen
 Kauden
 an Schen-
 ckeln.

Theus Millers Hausfraw bey Blm gelegē / eines mit-
 telmäßigen alters / hat ein offnen dieffen runden Schaden
 eines Königischen thalers breyt / ob dem innern Knodē des
 lincken fuß / vber die 6. jar an jr gehabt / neben grossen vn-
 sät-
 glichen schmerzen vnd pein auß verstopfung irer Monat-
 zeit verursacht / sene jr ein mal schon der brand dran kofmen
 grosse sorg gewesen / das man den Schenckel werde müssen
 herab schneiden / vor 3. jaren sene sie ins Seubad gezogen / vñ
 zwar zum theils heil worden / zum theils hab sie sich aller-
 erst daheim vollēd mit heidnischem wundkraut geheilt / sene
 aber bald wider der Schad außgebrochen / nach dem sie vor
 einem halben jahr vom Wunderbad hören sagen / habs
 fies lassen abhollen vnd vberschlags weiß allein gebraucht

Offner
 langwir-
 ger Schad
 am Fuß.

D ij davon

dauon sie in kurzer zeit gute linderung vnd heilung bekommen. Dahero sie bewegt worden/gar darein zu ziehen/welches auch geschehen/ hat gebadet 5.wochen lang/ vñ zu vollkommener heilung kommen / auch wider ohn ein Krucken gehn können vnd danken / dafür sie Gott dem allmechtigen lob vñnd danck gesagt/ vñnd nicht groß gut vñnd Geld dafür nehmen wolt.

Offener
schad am
Rücken vñ
langwiri-
ger Hust.

Georg Geyger von Machtelsheim Blawbeyrischer Bogten/seines alters nach ben 30.jar/zeigt an das er lange zeit groß Hauptweh vnd blödigkeit der massen gehabt / das ihm das Haar dauon außgefallen / darauff sene ihm auff dem Rücken vmb die gegne der Lenden / ein Beizel vñnd harte geschwulst auffgefahren/so groß als ein faust/ vnd besorgt / er müsse solchs eintweder allzeit an sich haben / oder herauf schneiden lassen / hab doch dran kein schmerzen gehabt/ es sey denn wenn er genieset oder gehustet / habs in gestochen. Nach dem ers nun fast ein ganz jar vmbher getragen / sihe da hab solch sein gewechs anfangen ein röthe bekommen vñnd wehe thun/ hab geschwären vñnd auffgebroschen/ daher ist jme obgenanter offner schad vñ loch am Rücken entstanden / dafür dise Person ein wochen 4. gebadet vnd zu vollkommener heilung gebracht worden/ hat ein langwirigen bösen Husten/ darnebe mit sich ins Bad gebracht/ welchen er auch hinder sich gelassen/da er hinweg gezogen.

Offener giftiger Car-
vuncel-
schad vnd
flüssige ge-
flechten vñ
geschwulst
am Schin-
bein.

Peter Ziegler zu Kirchē vnder Teck/etliche 50.jar seines alters/ist vor einem jar auch Peste franck gelegen/dauon er ein Cabrunculum vnd schwarze Blater vnden am lincken Fuß bekommen / mit grosse schrecklicher entzündung vñnd schmerzen / ist endlich vnden an Knoden ein exulceratio vñ offner schad verursacht worden / neben flüssiger beissender Geflecht vnd Krez / durch den ganzen Schenckel hinauff/ bis ans Gemecht / also ist er durch diß Pestilenzisch Gifte inficire

infiert vnd angesteckt worden/ hat dran vber ein viertheil jar kein rast noch Rhum gehabt / vnd kein vberschlag oder mittel etwas geholffen. Hab ich ihme auff sein ansprechen ins Wunderbad gerathen / vnd darinnen ein wochen 3. gebadet / ist auff das best heil vnd gesund wordē / auch zu Fuß heim gezogen/ da er ins Bad gefürt worden/ wolte nit groß Gelt dafür neñen/ hat auch hißhero guten bestand gehabt.

Samuel Schneller von Langennaw / ein Mann vmb 50. jar vngefährlich / ist mit einer flüssiger giftiger Raude / durch den ganken Leib angesteckt gewesen / sonderlich vmb die Stirn vnd Angesicht abscheulich gewesen/ vnd hat solche lepra vnd außsetzige Kres vber die 16. jar an seinem Leib gewehrt / habe etlich holz Curen gebraucht / vnd den Sawrbrunn vber die 8. jar besucht / aber nie können rechte heil werden / wie er in dem Wunderbad worden seye / hat 5. wochen mit dem baden zugebracht/ vnd dermassen heil worden am ganken Leib / daß er auch kein prurimum oder jucken mehr an der Haut entpfundē hat/ mit tröstlicher hoffnung/ es solte ein mal guten bestand haben.

Barbara Neblerin Zeyers Hausfraw von Boll / eines mittelmäßigen alters / hat etlich jar hero nach verlihrung jrer Monatzeit einen offnen grossen giftigen Wolffschaden gehabt/ einer ganken flachen handbreit am rechtē Fuß/ ist dise Person an der 5. wochen / fast durchauß heil vnd gesund worden/ vnd weil sie gar arm vnd schriftlich vhrkund von den Oberkeit gebracht/ hat sie auff jr J. G. Costen vmb Gottes willen außbaden können / dafür sie Gott dem Allmächtigen vmb glücklichen fortgang des Wunderbads/ anruffen vnd bitten wolle.

Apollonia Thomas Gelsen Hausfraw von Beilheim etlich 40. jar ires alters / hat einē abscheulichē bösen Krebs- schaden am Angesicht vnden am linken Aug ires zeichens gehabt/

D iij

gehabt/

gehabt eines Königischen thalers breyt / biß auff das Weir
 os suboculare dieß gewesen / sene vor 4. jaren jr daselbsten
 ein Bluteyßlin auff gefahren einer Erbs groß / mit vnßä-
 glichem grossen brennen vnd schmerzen / hab nachmals als
 so vmb sich gefressen / vñ zwar bißhero nichts darzu gethan /
 als allein sey vor 3. jaren ein Balbierer von Göppingen vñ
 ber sie gegangē / etlich wochen lang / aber hab sie endlich vn-
 verrichter sachen verlassen / vor einem jar hab sie angefan-
 gen den Wunderbrunnen abhollen vñnd vberschlagsweyß
 gebraucht / leine sauber thüchlin darcin genezt / vnd lehlich
 offte im tag vber gelegt / daruon sich der schad gereinigt / der
 schmerz gelindert vnd zum theils geheilt / daher sie bewegt
 worden / gar ins Bad zu ziehen vnd bey dem vrsprung selbs zu
 baden / ist ein wochen 4. darin gebliben / dardurch solcher
 Krebs gethötet / vnd mehrertheils geheilt worden / mit gros-
 ser verwunderung jederman / ist also wol content vñ beniegt
 heim gezogen / mit vermeldung / daß sie den Wunderbrun-
 nen wol mit sich führen vnd weiters damit anhalten / befin-
 de wol das diß Wasser wol so heilsam sey als alle Salben
 vnd Pflaster.

Georg Better Schultheiß von Beringen / seines al-
 ters 71. jahr / hat das Wunderbad auch besucht für etliche
 böse zustend / so er an seinem Leib gehabt. Erstlich wider ei-
 nen schmerzhaften Weidbruch / Zum andern für ein Huffes
 wehe vñ reißend Gesicht an Glidern / dardurch er im gehr-
 hefftig verhindert worden / hab offte auff der Gassen oder
 freyem Feld müssen nidersitzen / Zum dritten hat auch ge-
 badet für rothe flüssige Augen. Wider jetzt gemelte Kranck-
 heiten / hat dise Person gebadet / vnd nicht allein dardurch
 gute milderung seines schmerzens bekommen / sondern
 auch besserung des Gesichts vnd der Augen erlangt / dar-
 für er nicht wolte seinen besten Acker oder Wisen nemmen
 hab

Langwiri-
 ger schmer-
 zen an huff-
 ten / sampt
 einē Weid-
 bruch vñnd
 flüssige ro-
 the Augen

Hab solchen nutzen von andern Bädern / die er offte besucht /
nie gehabt.

Hans Fris von Schleidtorff Tübinger Vogten / nahe bey 60. Jahren / zeigt an das sein offner giftiger Wulffschad am rechten Fuß vber die 16. jar lang gewehrt hab / erstlich verursacht / das er das Schinbein an ein Holz gestossen / ist diser Schad einer flachen hand breyt / vñ auch so lang gewesen / dieß biß auff das Schinbein / das man auch die Ader schier blasß am Fuß gesehen eines abscheulichen anblicks. Wider diß sein schmerzlich anligen / nach dem diser ein tag 10. gebadet / hat man schon augenscheinliche vnd gute besserung vermerckt / hat sich die sacht von tag zu tag / damit also gebessert / das der Schad an der 4. wochen schon mehrertheils zugeheilt / vñ mit rahten gesundem fleisch außgefüllt / welches er durch andere Holz vnd badens Curen nit können erlangen / ist also damit content vnd beniegt heim gezogen / tröstlicher hoffnung es werde das Bad gute nachwirkung erzeugen / welches auch geschehen / wie mir selbs sein Sohn angezeigt / welcher ein Monat lang hernach widerum des Wunderbrunnens abgeholt mit vermeldē / es sene seinem Vatter das Bad wol bekommen / sey willens den Schaden daheim vollents zuzuheilen / vnangesehen ich solchs widerrathen / weil der Mann gar zu alt vñnd der Schad vom Leibfluß zu lang gewehrt hab.

Thomas Grabat von Schönfeld alla palada Benedi- scher Herrschafft ein Kauffmann / seines alters etlichen 50. jar / ist den 8. tag Julij ankommen vnd angezeigt / wie das er nun vil jahr hero vnßäglichen grossen schmerzen vñnd Glidwehe / durch den ganken Leib hab außgestanden / sonderlich gegen abend / darfür bißhero alle remedia vnd vnder- schidliche Curen nichts geholffen : In Teutschland / erstlich zu Straßburg / hab er sich in ein Cur gelassen / da er

3. fürneme Doctores raths gefragt / welche ihme endlich ins Wildbad gerathen / darinn er nahe bey 3. wochen gebliben vnd fleißig gebadet / aber nichts geholffen / von dannen seye er ins Carlins Bad im Behmerland gezogen / welches in nicht leiden wollen / sondern außgeworffen. Von dannen seye er gehn Nürenberg kommen / daselbst er wider bey den Doctorn raths pflegt / sonderlich hab er gute hoffnung gesetzt auff den Welschen Doctor Fuchs genant / aber es hab abermals die Cur fehl geschlagen / vnd sein Kranckheit je lenger je erger worden. Was geschicht? sihe in seiner höchsten bekümmernuß / vñ gleichsam desperation zeigt ihme ein guter freund an / er solle ins Land Württemberg sich führen lassen / daselbsten sey ein new erfundē Bad / welches wider dergleichen Glider Kranckheit / sehr heilsam vnd gut sein soll. Da hab er von stund an ein Fuhrman bekommen vnd sich dahin führen lassen. Nach dem er nun ankommen / vnd ein tag 8. angezeigter Badordnung nach / fleißig gebadet / auch den Wunderbrunnen nach badens gewonheit getrunckē / Ist er anfänglich hefftig dardurch purgirt worden / vnd durch den ganken Leib an der Haut außgeschlagen / sonderlich an den Händen / welche hefftig geschwollen vnd außgebrochen sein / vnd solches zum trittensmahl / von welcher zeit an / der schmerz von Glidern hinweg gangen / anfangen schlaffen / essen vnd trincken / da er doch solches lange zeit nit vermöcht. Nach dem er nun 4. wochen lang gebadet / ist er zu Fuß frisch vnd gesund hinweg gezogen / auch vorgehenden feyertag / da ihr Fürstlich G. allwegen den Badgästen zum lust vnd kurzweil / ein offnen dank erlaubt / selbs solle gedanket haben / mit öffentlicher bekäntnuß / er wolte für solche Badens Cur nit 2000. Thaler nemmen / sagt Gott dem allmechtigen / vnd allen den jenigen / so diß so heilsam Bad erfunden / lob vnd danck.

Daniel

Daniel Blanckenhorn Schulmeister zu Jesingen / ob Kirchen vnder Teck / seines alters 51. jahr / nach dem er ein jar 8. anhero ein Leger zu Bett müssen außstehn / vnd bißweilen 3. bißweilen 4. wochen müssen des Betts hüten: Also ist er endlich in ein weise geschwulst des ganken Leibs / so man die Wassersucht nennet / gerathen darwider er zwar raths gesucht bey rechten arzneyn verstendigen / ob ime da es Gott gefallen solte / dardurch möchte geholffen werden / aber es nit sein wollen. Ist er endlich auff mein rathschlag / In diß ihr J. G. wunderbad gezogen vnd fleissig gebadet. Ist zwar nit ohn das in den ersten 14. tagen / wenig oder geringer nutz erschinen / aber so bald der Leib vom baden vnd trincken auffgeweicht vnd purgiert worden / an der Haut außgeschlagen vnd anfangen schwizen / die geschwulst am ganken Leib abgenommen / vmbß herß leichterung erfolgt / der appetit vnd lust zum essen wider kommen / vnd in summa die sacht von tag zu tag nach seinem begeren / sich widerumb zu guter gesundheit geschickt. Vnd weil dise Person auch irer armut halbẽ schriftliche vrfund von dẽ Oberkeit gebracht / hat man in vmb Gottes willen / auff jr J. G. Costen lassen baden. Von dergleichen Wasser vnd Geelsüchtiger franckheit / ist auch sonst ein Burger zu Jesingen liberirt vnd gesund gemacht worden diß jars / vnd hat mit beyden Personen guten bestand.

Mary Schneider Beck vñ Burger zu Wisensteig / mittelmaßigen alters / ist mit einem gesalzenen Fluß vnd beifsenden langwirigen Kauden an beyden Füßen behafft gewesen / neben vnaußsprechlichen grossen gewüth vnd brennen / fürnemblich aber / ist solcher zustand ihme der vrsach halben sehr beschwärllich gewesen / das solcher Fluß vbel gestuncken vñ so hefftig geloffen / das ime daruon der strumpff immerdar genasset / vnd dardurch von Leuten hefftig geußere

Wasser
sucht.Gesaltener
böser Fluß
vnd Kretz
an Schin-
bein.

E

sere

fert worden/welche sein Brot nit wollen essen. Vñ wie wol er vor einem jar das Marggraffen Bad besucht / mit guter hoffnung / es möchte solcher Fluß auffgetrücknet werden / hat es doch nit sein wollen / haben auch andere mittel nichts erschiessen wollen / hat Gott der allmechtig sein Gnad verliehen / das innerhalb 4.wochē diser Person geholffen worden / vñ ist ganz glatt ohn allen pruritu vñ jucken wider gesund zu Haus gezogen / den er wider kan schlaffen vñ hat gute ruw / vñ darff sich wider sehen lasse / sollte aber es je auff des nit bestand habē / wolle er auff's zukünfftig jar widerkommen.

Von dergleichē krankheit / ist auch diß jars Theis Lauren Weib von Winderbach / welcher ein mercklicher casus oder fahl gewesen / da auch jedermā verzagt / heil frisch vñ gesund worden / vñ bißher wie ich verstanden guten bestand gehabt.

Reißend
Gicht vnd
gewüth in
Glidern.

Martin Miller von Eberspach / hat gebadet für Glider schmerzē vñ reißend gesucht in schenckeln / welches anligen vil jar gewehrt vnd kein mittel helffen wollen / ist durch das Wunderbad / diser Person auch geholffen wordē / wie er angezeigt / sey solcher schmerz vnder sich gangen / vnd durch die Fersen entpfündlich hinauß gezogen / wolte nit darfür des Suckers gut vnd gelt nehmen wie er geredt.

Offner
Schad am
Fuß.

Osiar Widman von grossen Heppach im Ramsthal gelegen / nahe bey 50. jar / hat bekenet / daß er auff ein zeit vngesfärlich vor 4. jaren auff dē fuß am Keyhen habe schrepffen lassen / vnangesehen er vor mehr daselbsten scarification gebraucht / jedoch sey diß malē solch vnglück darben gewesen / dz es geschwollen vñ geschworen / darauß seye solch vlcus vñ böser giftiger schad verursacht wordē / hat dises anligen im nit allein grossen schmerzē gebracht / sondern auch im gang verhindert / an der dritten wochen ist diser Schad schon alerdings heil gewesen vnnd darneben auch sonst gute besserung d' gesundheit gebracht / dardurch der gut redlich Mann hefftig erfreut wordē / vnd öffentlich bekennet / daß diß Bad

ein wunderbarliche Krafft in sich haben müsse/ weil er durch andere Bäder nit mögen heil werden.

Hans Henne Burger zu Boll ein Roschenschler / eines mittelmaßigē alters/ seiner aussag nach/ vor einē jar ein reiß gethan in Osterreich/ da er den im vñkehren vñ heim reisen auff dem weg grosse kelt müssen außstehn vñ vbel erfroren/ drauff sich ein grosser schmerz oben am lincken schenckel erhebt mit grosser rother geschwulst / welche darnach außgebrochen vnd einen bösen offnen schaden per abscessum geben / welcher von Weihennacht biß nach Ostern gewehret/ dauon er ganz lamb an beidē schenckeln worden/ das in sein Hausfraw allwegē ins Bad auff dem rucken getragen/ ein vnd auß dem zuber heben müssen/ welches erbärmlich ist zu sehen gewesen/ das d'jenig/ so zuvor auff den Rossen/ damit er baretiert vnd gedauschet hat/ jezunder auff seiner Hausfraw ruckē reitē müssen. Nach dem nun dise Person gebner Badordnung gmeß gebadet/ ist es von tag zu tag besser worden vnd an kräftten zugenommen/ vnd ist dz weiß geeder/ welches durch einstrupffung beide Füß hinder sich ad nates od an hindern mit reuerens zu schreiben/ wider außgangē vnd gestreckt worden/ wider wol mögen essen/ schlaffen vnd sein arbeit widerumb angreifen können / darumb er Gott dem Herrn lob vnd danck versprochen.

Contract
tigkeit der
Füß vñnd
abnehmen
des ganze
Leibs.

Catharina Jacob Richen Hausfraw von Schorndorff/ mittelmaßigen alters / mit was bösen vnheilsamen offnen schaden vnd flüß sie behafft gewesen lange zeit/ werden sich wissen zu er innern die jenigen / so dieselbē vor dem Bad gesehen. Ist der casus vom anfang also beschaffen gewesen/ denn sie vor 17. jaren am ganzē Leib geschwollē auß verhaltung irer blödigkeit / sene sie doch widerumb durch ein Doctorē gesund wordē/ ein jar 3. hernach hab sie die füß im kaltē wasser erfroret vnd außgebrochen an etlichen orten vñ bald widerin durch ein püluerlin vñ sälblin heil wordē/ hab auch

Offner
Schad am
Füß.

E ij kein

kein bestand gehabt / dem kurz hernach sey nit allein wider
rumb ein vnder dem innern Knoden des lincken Fuß ent-
standen / welches hefftig geflossen / sondern auch die Zehen
auffgebrochen / vñ sey also vbel gemartert vnd gepeinigt ge-
wesen / dergestalt / das auch der ander Zehen gemelts Fuß /
mit dem Nagel vnd einem Gleich hinweg gefallen / vñ ohn
alle heilung je lenger je mehr vmb sich gefressen / dauon sie
weder tag noch nacht kein ruw gehabt / auch nicht auff den
Fuß treten mögen / Für diß nun ihr schmerzlich vnd be-
schwärlich anligen / hat sie 5. wochen gebadet / vnd zu genz-
licher heilung gebracht worden.

Flüssige
Kauden
vñ geflecht
am schen-
ckel.

Andreas Heilmann von Winsheim auß dem Fran-
ckenland / mittelmässigen alters / ist vber die 9. jahr lang dem
Kothlauffen vnder worffen gewesen / welches vor 3. jahren
an lincken Schenckel kommen vñ grossen schmerzen bren-
nen vñnd jucken verursacht / dardurch endlich ein flüssige
Kauden vnd Krez / welche den ganzen schenckel eingenom-
men / dran erschienen. Vnd ob wol dise Person vil vñ man-
cherley eusserlich vñ innerliche mittel gebraucht / hats doch
nichts oder wenig erschiessen wollen. Vor 2. jahren hab er
das Wildbad besucht / aber nit mögen heil werden. Hat as-
bermals Gott gnad geben / daß diser Person / durchs Wun-
derbad geholffen worden / innerhalb 4. wochen / hat doch we-
gen hitziger Leber / die acidulas oder Sawrbrunnen von Ja-
benhausen / darneben getruncken / vnd endlich auch zur ab-
fülung ein tag 8. im Sawrbrunnen außgebadet. Vnd wie
ich nachmals verstanden / sol es gute bestand mit diser Pers-
son haben.

Offne zer-
henjartige
Schaden
am Kno-
den.

Zeit Dumma von Krauten / auch auß dem Francken-
land / seines alters etlichen 50. jar / hat an beyden Füßen vn-
den am innern Knoden / alte offne dieffe Schaden / vber die
10. jahr gehabt / welche an der figur vnd gestalt / wie Kenes
oder

oder Nieren anzusehen gewesen / darneben auch sonst ein geschwollen groß Milz vnnnd schwarz Geelsucht gehabt / Für diß sein antigen / hat er anfangen zu baden vnnnd den Brunnen warm getruncken / dauon er zu vnderchiedlichen mahlen purgiert worden vnnnd hefftig an der Haut außgeschlagen. Hat sich die sach mit diser Person von tag zu tag zur besserung geschickt / das nit allein die geschwulst vnd anhangende böse zustend vergangen / sondern auch seine Ulcera vnd Schäden dermasse zugeheilt / daß sich jederman darüber verwundern müssen.

Jacob Kenner von Schneid bey Schorendorff / 60. jar alt / hat sich nahe bey 18. jahren / eines schmerzens vmb das Herzgrüblin vnd Magenmul beklagt / in offtermals dermassen getruckt vnnnd geenstigt / daß er in ohnmachten müssen dahin fallen / vnd kein Speiß nach Trancck können behalten. Hat für diß sein Magenwehe gebadet ein wochen 3. vnd zu guter gesundheit dardurch kommen / hat der Wunderbrunn dise Person per sedes nit durchbrochen / deshalb ben ihme ein laxier Bintelin verordnet worden / aber zum andern mahl hefftig außgeschlagen vnd geschwist.

Hans Zwinckers Hausfraw 70. jar alt / hat einen Dollfuß oder ölschenckel vnseglicher größe gehabt / welcher vber die 24. jahr gewehrt / wie sie glaubwürdig dargethan / daran etliche breite dieße löcher gewesen / so vber die 8. jar offen gewesen sein / vñ so jämmerlichen schmerzen dran außgestanden / sonderlich bey nacht / hat ohn ein Stecken nicht gehn können / oder ohn andere Personen so sie geführt / so bald sie ins Bad kommen hat der schmerz ein tag 8. nachgelassen / aber nachmals wider kommen / welches sie gar verzag gemacht vnd willens worden wider dauon zustehn / aber nach dem man jr zugesprochen / hat sie mit dem baden fürgefahren / vnd bald der schmerz dauon wider nachgelassen / vnnnd

E iij durch

Durch die gäße bades zeit nit mehr können/hat die geschwulst auch abgenomien eins guten theils / die vlcera od löcher anheben flach werden vñ dapffer zugeheilt/ dergestalt/ dz sie in d' 4. wochē mit guter besserung vñ gesundheit heim gezogen. Vnangesehen/ ich nit gern gesehē/ daß sie den schadē lassen zu heilen/habs etlich mal gewarnet/ aber sie nit folgen wöllen. Doctor Bernhardus Paludanus/ein herzlicher vnd vberaus berümbter Natur erkundiger/ welchen jr J. G. vergangnē Sommer ins Wunderbad/dasselbig zu besichtigē geschickt/nach dē er disen schaden gesehen/ hat er in für vnheilsam gehalten mit vermelden / wenn dise vlcera oder schaden zu heilen / so werde die alt Fraw auch wider jung von disem Bad werden/so für ein vnmüglich ding hat ers gehalten/ist solches vermittelst Göttlicher Gnadē dannach geschhehen: Gott wölle sein Gnad weitters geben.

**Langwiri-
ger Hust
vnd haupt-
fluß.** Christin Spiegel von Schornbach nahe bey 70. jaren/ hat etlich jar ein bösen husten gehabt / welcher in offtermals also zerissen/vnd den Leib bewegt/ daß ime das hell blut zur Nasen heraus geloffen vñ geschwulst im hals gemacht/ davon er nit wol essen noch trincken können/ darneben hefftig am ganzen Leib abgenomien. Wider disen husten langwiri- gen Fluß/ hat er auch ein wochen 4. gebadet/vñ darvon gesund worden/vñ weil d' Wunderbruñ dise Person per sedes od stulgang nit bewegē wöllen/sondern vil mehr verstopft/ hab ich ime darneben ein claretum vnd brustdrancē verordnet/ welcher ime zur gesundheit gute befürdernuß gegeben.

**Sifftige
Kneizel
vnd Fluß-
beulen am
Hals.** Hans Sundheimer von Scheltlingen/ein Knab vñ die 14. jar/hat mit sich am hals ins Bad gebracht/ auff d' einen seiten biß auff die Brust herab/gwisse harte flußbeulen vnd kneizel/deren vber die 10. gewesen/ zum theils offen/darauß stenckende materia geflossen / zum theils allererst im Bad auffgebrochen/hat grosse pein vnd schmerzen daran außgestanden/vnd wie er angezeigt/ist er vergangnen Sommer ab-

So verunreinigt worden / durch ein giftige nater oder schlang
welche sein Mutter im gras vnwissent heim getragen / vnd
an in gesprungen / dardurch er also vergiftt worden. Ist di-
ser Knab innerhalb 3. wochen / widerum heil vn̄ gesund wor-
den / vn̄ mit freuden von seine Eltern zu Haus abgefördert
wordē / da doch zuvor kein mittel nach pflaster helffen wöllē.

Brsula Meyerin von Weilheim ob Kirchen / Gall St-
scher Hausfraw daselbstē / ist auß langwirigem Hüfftwehe Lähme der
Fuß von
langwiri-
gem Lein-
denwehe
vnd Hüfft
schmerzen
vnd schmerzen / so sie lange zeit außgestanden / an schenckeln
lahm worden / dz sie allein nit gehn nach irer arbeit obligen
können / welches ihr ober die massen beschwärllich gewesen /
Vn̄ ob sie schon arzenen / mittel vn̄ holz curen versucht / hats
doch nit wöllen helffen / hat wid̄ diß jr anligen / dz Wunder-
bad besucht vn̄ mit baden vn̄ trincken / ein wochen 3. fleissig
gebraucht / vnd solches mit guter besserung irer gesundheit /
denn sie wider zimlich gehn können / vnd d̄ schmerz an hüff-
ten verschwunden / darfür sie Gott lob vnd danck saaē thue.

Mit jekt gemelter Kranckheit / ist auch Jacob Mollen
Hausfraw von Weilheim behafftet gewesen / vnd auch
durchs Wunderbad zu guter besserung kommen.

Georg Hartheuser von Nörlingen 50. jar seines alters /
was für ein böse giftige Krez vnd flüß er am lincken schen-
ckel gehabt / wissen sich wol zu er innern andere Badgäst / so
sein schaden gesehen / denn er löcher dran gehabt / neben den Langwiri-
ge böse krez
vnd Schae-
den am
schenckel.
giftigen geflechten / als wenn die hund drauß gefressen hettē /
vnd wie er angezeigt / hat er etlich mahl Bäder besucht vnd
vnder andern auch / das Marggraffen Bad / sene auch zu
Miltfingen gewesen im Othenwald / da vil wunderbarli-
che heilungen vor 2. jaren geschehen / aber in nichts geholff-
fen / hat jm in disem Bad Gott auch gnad geben / daß er in-
nerhalb 4. wochen wider gesund heim gezogen.

Georg Gernerest von Schweickē bey Winenden etlich
vn̄ 70. jar alt / wsil er in seiner jugēd hefftig erfroren (den̄ er
E iij lange

Wartech-
tige wun-
derbarliche
gewechs
vñ beiffede
knipffel an
der Haut
hin vñnd
wider.

lange zeit ein Feldschiz gewesen) ist er vor einem jahr an
hend vnd Füßen hefftig geschwollen vñ reudig worden am
ganken Leib. Da nun solches wider von sich selbs hinweg
gangen/ sihe da hats hin vñ wider an der Haut rothe Mä-
ler geben/ welche in vber die massen vbel gebissen / hab müs-
sen krazen/ wenn der Keyser vor ihm gestanden were / vnd
wo er gekrazt / daselbsten geblutet / vnd gewisse gewechs oder
Fleischlin die von tag zu tag / je lenger je grösser worden.
Hat diser gewechs an seiner Haut / die ich selber gezelt / vber
die 40. gehabt / so an der grösse gestalt vnd form ein vnder-
scheid gehabt / vnd haben solche excrementia vnd gewechs
ein ansehen gehabt / wie etwa an Beinen gewisse schwam-
mechte materia heraus wachset. Oder wie Enterstock an
abgenommen Hennen / da vil Eylin groß vnd klein anein-
ander hangen vnd verknipfft sein. Dergleichen knipffel wie
oben gemelt / hat diser hin vñnd wider an der Haut vil ge-
habt / so vmb die radicem oder wurzel hefftig gebissen / vnd
oben blut vnd gelbe feuchtigkeit von sich geben wenn ers ge-
sicket. Solch sein Kranckheit wie er angezeit / hab er vilen
Doctoribus vnd Balbierer gewissen vñnd vrtheilen lassen /
hats aber keiner nennen / oder mit gewissen Namen tauffen
kennen. Dem sene nun wie im wölle / hat er ein wochen 3.
darfür gebadet / vnd so vil erlangt / das die scabies oder krez
geheilt / etliche seiner gewechs auffgebrochen vnd abgederet /
des mehrertheils aber ganz gebliben / doch nit mehr geflos-
sen vnd gebissen / da er nun 3. wochen erreicht vnd zimliche
besserung erlangt / auch wegen obligender armuth lenger
zu baden nit vermöcht / ist er widerumb heim gezogen vnd
sich weder Costen nach arbeit dawren lassen.

Es haben sich auch im Wunderbad auch gefundē / zwen
alte betagte Männer von Plennigen Stuttgarter Vog-
tey / der ein mit nammen Georg Scheynig / diser hat sich
vmb

vmbß herß vbel befunden / vnd böse flüssige Augen gehabt / Flüssige
Augen vñ
blöd Ges-
icht.
 daran er am 10. tag schon gute besserung entpfunden / Der
 ander mit Namen Bernhard Vogel / hat sich auch vmbß
 herß vnd glidern vbel befunden / vnd so ein böß vnd blöd ge-
 sicht gehabt / daß er allein zu gehen nit gedrawen derffen.
 Nach dem diser ein tag 12. mit baden zugebracht / hat er bes-
 keñet / daß er an seiner gesundheit gute besserung spüre / son-
 derlich an Augen / könne wider allein spacieren / sey vor offte
 im Wildbad gewesen / aber er sehe das diß Bad dasselbig an
 der operation weit vbertreffe / so wol besinde er sich vom
 baden.

Die Kellerin von Göppingen etlich 30. jar ihres alters /
 hat etlich Monat lang ein beschwärlichē tussim vñ Husten
 gehabt / der sie gar vom Schloff vnd Leib gebracht dermas-
 sen / daß man nit anders vermeint / es seye ein Lungen suchte
 vnd müsse daran sterben. Nach dem sie aber vernommen /
 das diß Bad wider dergleichen flüssige Kranckheit / so fest-
 lich gut / hat sie sich auch darein führen lassen / vnd gebür-
 licher Badordnung nach gemess / verhalten nicht allein im Langwri-
ger Hust
vnd abne-
men des
Leibs.
 baden / sondern auch trincken. Da kaum acht tag vmb wa-
 ren / hat der Hust nachgelassen / vnd sie vermittelst Göttli-
 cher Gnaden / von tag zu tag am Leib wider zugenommen
 vnd frisch gesund vñnd starck an der 3. wochen widerumb
 heim gezogen / darüber sich jederman großlich verwundert.

Peter Kopp von Blawbchern etlich 50. jar seines alters /
 ist seiner bekantnuß nach / nun vil jar hero dem Rothlauf- Rothlauf
vñ Haubt-
flüß.
 sen vnd Haubtflüssen vnderworffen gewesen / hat vor 2. ja-
 ren auch diß Bad besucht vnd so vil nuß dauon bekommen /
 daß er so offte mit demselbigen vnder des / nit wie zuvor ves-
 riert worden / ist derohalben diß jar widerkommen / vnd ein
 wochen 3. gebadet / vnd den Wunderbrunnen nach badens
 gewonheit getruncken / ist er dardurch hefftig purgiert wor-
 den.

den/ sonderlich aber an Händen dermassen außgeschlagen/
 Daß er vermeint er werde nit können heil werden/ vnd nicht
 weniger auch hefftig geschwitz / drauff gute besserung vnd
 leichterung an seinem Leib gefolgt/ tröstlicher hoffnung/ es
 werde auch gute nachwirkung des Bads kommen / ist al-
 so wol content zu Hauß wider heim gezogen.

Langwi-
 rig Kopff-
 wehe / sau-
 sen der D-
 ren/ mit blo-
 digkeit des
 Gesichts
 vnd alten
 Schaden

Michael Steidlin von Seissen / eines mittelmässigen
 alters / hat gebadet für ein bösen offenen Schaden am rech-
 ten Schinbein / neben langwirigem Hauptwehe / klingen
 vnd sausen der Ohren / wie nit weniger auch ein blöd Ge-
 sicht/ mit vermelden/ das er auch vor 2. Jahren diß Bad be-
 sucht / wider jetzt erzelte böse zustend / welches jme also wol
 bekommen/ daß er lenger als ein ganz jar daruon gute ruw
 gehabt: sonderlich habs den Augen vñ Gesicht wol gethan/
 welches er durch gewisse Augenarznei niemals erlangen
 können. Gleich wie aber jme das Wunderbad damals an
 seiner Leibs gesundheit wol erschossen / also befinde er jetzt
 widerumb daruon grossen nutz / vnangesehen er allein ein
 tag 4. dem baden können abwarten wege mangel des gelts
 vnd obligenden geschäft die er daheim zuverrichten/ ist also
 wol content wider heim gezogen.

Krampff
 in Gliedern
 die Gribel
 krankheit
 genannt.

Anna Hans Brodbeckens seeligen Tochter von Holz-
 gerlingen / eines mittelmässigen alters / hat gebadet für die
 Gribel krankheit wie mans nennt/welche nichts anders ist
 als ein vnsäglicher grosser schmerz vñ gewüth in Gliedern/
 dauon die Glider Arm vnd Schenckel dermassen zusam-
 men gezogen vnd gekrempt werden / das die patientes
 nicht anders meinen denn sie müssen daran sterben vnd
 verderben. Wider diß jr beschwärllich anligen/ wie gemelt/
 hat sie gebadet ein wochen 3. dauon gute ruw vnd besse-
 rung erlangt / welches durch andere Curen nie geschehen
 mögen.

Zacharias

Zacharias Kancken Tochter von Reichenbach/ihres al-
 ters 18. jar vngefährlich/hat an beyden Schinbeinen dieffe
 Fistel vnnnd Beinschretige löcher gehabt / daran sie grossen
 Schmerzen erlitten/ vñ wie sie angezeigt/ hat sie etlich Holz
 Curen/schmierung vnnnd reichung erfahren vnd nie mögen
 heil werden/hat Gott die gnad geben/das ihren das Wun-
 derbad die Beinschreth vnnnd giftigkeit außgezogen / gerei-
 nigt / vnnnd an der 4. wochen allerdings heil vnnnd gesund
 gemacht / doch man durch die Wundarknen mit eröff-
 nung der Fistel hilff thun müssen / hette sonst das Bad sein
 operation nicht also haben können. Ist auch dise Tocht-
 er durchs Bad wider starck worden / vnnnd an Füssen zim-
 liche kräfte bekommen / darab sich jederman verwundern
 müssen.

Fistel/
 Schad vñ
 Beinschret
 an Schin-
 beinen.

Dergleichen Schaden hat auch Georg Brenner an
 Schenckel gehabt / vnd auch zur heilung gebracht worden.

Martin Schwab von Redern/50. jahr alt/ hat dis Bad
 für ein Magenschmerzen vñ anligen / so er lange zeit vmb
 Herz gehabt / neben kurzem Athem vnnnd Lähme in Gli-
 dern / besucht / ist dise Person innerhalb drey wochen von
 gemelten bösen zustenden erledigt worden / hat auch die
 Axungiam Lunæ 2. mit purgierenden Weissbeer Syrup
 vermischet / im Wunderbad eingenommen / vnnnd ist ihme
 gar wol bekommen / in eröffnung des Stulgangs / wel-
 chen der Wunderbrunn / vnangesehen er solchen in grosser
 meng kalt vnd warm getruncken/nit mögen befürdern odes
 purgieren.

Magen-
 wehe vnd
 kurzer A-
 them.

Des Juncker Forstmeisters Hausfraw/eines mittelmäß-
 figen alters von Brach / hat auch ein wochen 4. im Wun-
 derbad zugebracht vnd gebadet / für ein Magenweh vñ an-
 ders anligen / mit sonderm nutzen vnnnd verbesserung ihrer
 gesundheit. Zu mercken / das dise Edel-Fraw den Sawr-
 brunnen

Magen-
 wehe.



Brunnen ihren Magen nit dulden können/ aber des Wunderbrunnens nit gnugsam ersettigen mögen / vñnd solchen auch dem Wein für gezogen/ als ein besonders Magewasser.

Leibs geschwulst vñnd böse flüssige Nauden.

Anna Gremerin von newen Lautern bey Mürhard / ires alters etlichen 20. jaren/ ist groß geschwollen am ganzen Leib/ ins Wunderbad anköm̄en/ neben bösen flüssigen wilden Nauden/ von erhaltung irer ordenlichē zeit verursacht/ hat ein wochen 3. gebadet / ist die geschwulst ganz hinweg gangen/ die kreß geheilt/ vñnd dardurch zu guter besserung irer gesundheit gebracht worden. Hat aber dise Person wegen kalter zeit vñnd beschliessung des Bads/ zu mehrerm bestand nit außbaden mögen/ gedenckt auff zukünfftig jar wider zu kommen.

Langwierig Augēwehe vñnd blöds Gesicht.

Hans Fischers Hausfraw von Dmpten Kircheimer Bogtey/ mittelmässigen alters/ wie angezeigt/ hat sie vber die 12. jahr grossen schmerzen an Augen gelitten / vñnd dardurch ein blöds Gesicht bekommen / ist dise Fraw schon etlich mahl im Wunderbad gewesen/ vñ bekennet öffentlich/ daß jr kein Augenarzet deren rath/ sie doch oft gepflegt/ habe können einige mitigation oder milderung schaffen / biß sie angefangen das Wunderbad gebrauchen / hab sie von stund an gute rum dauon bekommen/ vñ schwöre sie ein end daß Augen vñnd Gesicht habe sich eines guten theils dardurch gebessert / schlags daheim mit leinen saubern tiechlin darüber/ vñnd wäsche die Augen damit/ habe kein besser Augenwasser oder Collyrium nie gehabt.

Alte offene vñ schmerzhaftte Schäden an beyden Füßen

Christoff von Degenfeld Oberster hoff vñnd Cammer Rath zu Stutgardt/ eines hohen mercklichen alters/ ist den 1. Septemb. zu Kirchen vnder Teck ankommen mit der intention/ das Wunderbad auch zugebrauchē/ für seine langwirigen alte schmerzhaftte Schäden an beyde Füßen welches denn geschehen in ihrer Fürstlichen Gnaden Schloß daselb-

daselbsten / dahin man das Wunderbad täglich geführt /
 haben jr Best vñ Herzigkeit fürgeschribner Badordnung
 gemeh fleissig gebadet / vñ dasselbig getruncken / daher den
 geschehen / daß sie nit allein solches ohn allen bösen zustand
 (dessen man den grosse sorg gehabt / weil der Juncker sehr
 math vñ flüssig / auch des badens vil jar hero nit gewohnt
 gewesen) wol dulden mögē / sondern auch dadurch die schä-
 den zu guter besserung vñnd heilung gebracht worden / denn
 so bald jr Best vñ Herzigkeit anfangen baden / sihe ist als
 bald der unsäglich groß schmerz vñ brennen / welches zu
 vor lange zeit gewehrt / dardurch sie kein schlaff rast nach
 Ruw haben können / auch dafür kein remedium satis effi-
 car gewesen) gelegt vñ gemiltert worden / vñ ob gleich wol
 der schmerz vnder dem baden / bißweilen sich wider erzeigt /
 ist er doch so hefftig nit mehr gewesen / hat auch nit mehr so
 lang gewehrt / wie vor dem baden.

Weiters hat das Wunderbad die Ulcera oder schaden
 augenscheinlich gereiniget vñ gemilteret / vñ die giftigkeit
 dermassen außgezogē / das man schon am 14. tag den schen-
 ckel vil geschlechter vñ gesunder gespürt / darneben sich von
 tag zu tag die heilung wol angelassen / gut Exter erschienen
 vñ an der 4. wochen die Ulcera / sonderlich am lincken
 Fuß eines guten theils enger vñnd flacher sein geschinen /
 doch ists algemach darmit zungen / dieweil solche Scha-
 den lang gewerth / der Fluß gar zu starck gewesen / vñ der
 Juncker nicht bey dem Bhrsprung gebadet / auch weniger
 streng baden können / wegen blödigkeit des Haubts. Nach
 dem nun jr B. vñ H. vber die 100. vñ etlich stund mit dem
 baden zugebracht / vñ des badens schon anheben vberdrüß-
 sig werden / haben sie bedacht auff dißmal ein end daran zu
 machen / denn sie besorger man möchte dem Leib mit dem
 baden zu vil thun / vñ vileicht anders verursachen / Sol-

chem frem fürnemen / hab ich nit zu wider sein können / in
 betrachtung / die geschwâr möchten zu vil zuheilen / vñ dar
 durch der Leibfluß / welcher vil jar her durch dise orth gleich
 sam als fontanelen sein außgang gehabt / widerumb in die
 jinnerliche glider schlagen / möchte demnach besser vñ heils
 samer sein / das mans auff dißmalē bewenden ließ / vñ spars
 te biß auff zukünfftigen Frieling da mans denn widerumb /
 bey dem vrsprung selbstē gebrauchen möchte. Sihe vnder deß
 kombt von jr F. G. schreiben an J. B. von Dezenfeld / mit
 dem beuelch / daß er nach ein tag 8. soll dran strecken vñ bas
 den / welchem den gehorsamlich ist nachgesetzt worden / da
 rauff hat jr B. vnd H. die Brandader am lincken schenckel
 eröffnen lassen / vnd nach demselbigen auch die Emplastra /
 so für die Badgäst deß Wunderbads angeordnet worden jr
 dergleichen fallen / versucht vnd mit nuß gebraucht / Sein
 dieselbigen den 14. Octobris / mit freuden heimgezogē / mit
 tröstlicher hoffnung / es werden die sachen gutē bestand ha
 ben / vnd das Wunderbad gute nachwirkung verschaffen /
 welches auch geschehen. Denn ob schon ihr B. vnd H. zu
 Stutgart / nach dem Bad widerumb einen frembden Mes
 dicum oder Arzet drob gehabt / welcher mit seinen mitteln
 zur mehrer heilung gute befürdernuß gethan / sene doch die
 heilung demselbigen nicht allein zu zuschreiben / sondern vil
 mehr dem Wunderbad / welches nach Natur vñnd eygen
 schafft allerheilsamen Bäder / auch sein nachwirkung bey
 den Badspersonen erzeigen vnd beweisen thut / wie den sol
 ches ich bey vilen exempeln bißhero wargenommen.


Alter off
 ner gifti
 ger schad
 am Ellen
 bogen / von
 einē Kop
 biß.

Hans Schnauffer vñnd Gastgeber von Keimingen / bey
 Lehnberg gelegen / seines alters etlich vnd 60. jar / ist den 6.
 tag Septemb. auch ins Bad komen vnd eingesseßen / wider
 sein langwirig anligen / welches ein offner vmbfressender
 böser schad gewesen am lincken Ellenbogen deß Arms / einer
 märcklicher größe / vnd nit anders außgeseßen / als hetten die

Hund oder wölff darauß gefressen / hat hefftig geflossen vnd bösen gestanck mit reuerentia zu schreiben von sich geben / anfänglich von einem Rossbiß verursacht. Hat Gott sein gnad geben / daß diser sein schad innerhalb 4. wochen zugeheilt worden / auch sonst an seiner Leibs-gesundheit gute fristung erlanget / dafür er nit groß gut vnd gelt nehmen wolte.

Caspar Wengers von Kirchen vnder Teck Haußfraw / mittelmaßigen alters / hat wider ein alte schmerzhafter geschwulst an beyden Füßen gebadet / vnd den Wunderbrunnen nach badens gewonheit getruncken / vnd nach dem sie ein wochen 3. mit baden zugebracht / ist jr von diser Kranckhen geholffen worden / kans nit gnugsam loben vnd preisen.

Pobagränische vnd schmerzhafter geschwulst.



Urfund von Heilpronn / wegen Ambrosi Lawren Tochter / so Anno 97. vom guten Leuthausß daselbsten ins Wunderbad bey Boll / geschickt worden / vnd nachmals für rein erkentt worden / vnd nach guten bestand hat.

Die Ehrueste Fürsichtige Weise / Großgünstige gebietende Herrn. Auß E. E. S. W. beuelch / haben wir hierzu verordnete abermals besichtiget Ambrosium Lawer vnd sein Tochter im guten Leuthausß / mit welchen beyden es also beschaffen / Zue den Vatter befinden wir / daß er fast mit seiner alten krankheit beladen / seine mit reuerenz zu melden / alte böse wilde vnd weisse Klauden auff dem Hauß vñ Armen / auch sonst an dem Leib vn sauber / nit allerdings empfindlich ist / vnd zubeforgen / da die pori in zukünftigen Friling sich wider eröffnen / vnd das vnrein Geblüt sich auß dem Leib / wie zu derselbigen zeit zugeschehen pflegt / in eusserlichen Glider begeben wird / es möchte sein Kranckheit widerum vber hand nehmen. Halten derowegen gänzlich dafür / daß er von andern reinen vnd saubern Leuten solle abgesündert bleiben.

Die Tochter befinden wir / daß sie allerdings sauber vnd rein ist / hat verschienen 97. jars / das new Bollerbad / nit weit von Göppingen /

S iij gen /

gen gelegen / gebraucht vñ dauon durch Gottes gnaden / gesund worden / befindet sich durchaus also / daß wir darfür halten / sie möge hinfür wol vnder vñ bey saubern Personē jr Wohnung habē / doch daß sie fñrohin sich irer Eltern (die nach vnsauber seind) gänzlich enteusere.

Das haben wir E. E. F. W. auff derselbigē ginstigen beschehenen beuelch vnderdienstlich anzuzeigen nit vnderlassen sollen nach wöllē.
Signatum den 23. Januarij / Anno 98. zu Heilpronn.

E. E. F. W.

Vnderdienstlicher

Johann Haug M. D. Bestelter
Physicus zu Heilpronn.



Brfund von Heilpronn / wegen Am-

brofi Lawren / so mit Aufschigen wilden Kauden

beladen / im Wunderbad rein worden /

Anno 98.

Die Ehrnueste Fürsichtige Weise Großgünstige gebietende Herrn / wir haben den 19. Octobris / Anno 98. Ambrosium Lawer / auff E. E. F. W. beuelch abermals besichtiget (welcher den 23. Januarij / im lauffendē 98. jars auch beschauwt worden) vñ befinden ime auff dismalen / nach gehabter Badens Cur im Bollerbad oder Wunderbad bey Boll (doch er auff dismalen allein den Brunnen getruncken / ein wochen drey) also beschaffen / daß er jeziger zeit wol bey andern reinen Leuten sein / vñ das täglich Brot gewinnen wird können. Ob es aber einen bestand mit ime werde haben / weil er ein zimlicher alter Mann ist / wird der Frieling darin sich allerley feuchtigkeit im Menschen zu regen pflegen / mit sich bringen. Dises haben wir E. E. F. W. auff derselben beschehenen beuelch vnderdienstlich anzuzeigen / nit vnderlassen sollen nach wöllen.

E. E. F. W.

Vnderdienstwilliger

Johann Jacob Haug M. D. vnd bestelter
Physicus zu Heilpronn.



Bericht

Des Fürstlichen Württembergischen
Wunderbads vnd Brunnen zu Boll/ So durch den Hoch-
gelehrten vnd berühmten Herrn Joannem Bauhinum/ der Arzney-
Doctorn/ ihrer F. Gnaden Leibarzten beschriben:
In Reimen verfasst/

Durch

M. Johannem Schatz/ Pfarrer
zu Holzheim.

Sott als die Höchste Manestat/
Himmel vnd Erd erschaffen hat.
Sonn Mon vnd Stern das Firmament/
Vnd was mann auff dem boden findt.
Zu letsten auch nach allen sachen/
Gesprochen last vns Menschen machn.
Die formiert er nach seinem bildt/
Erzeigt damit sein güte mildt.
Setzt den Menschen ins Paradeis/
Erlaubt im auch mit allem fleiß.
Das er über als in gemein/
Im Paradeis soll meister sein
Allein soll er an disem orth/
Fleißig gehorchen Gottes wort.
Des Baums des wissens müßig gehn/
Sonst würd sein sach baw fellig stehn.
Zu dem so drawt im Gott zur sach/
Vil Herckenleid vnd vngemach.

(1)

So

So er nit wird ghorchen der stimm/
Das er in straffen woll in grimm.
Aber durchs teufels trug vnd list/
Adam in dsünd gefallen ist.
Vnd hat sich nit allein verderbt/
Das Menschlich Geschlecht hats von im g'erbt.
Das es mit jammer vnd Ellend/
Hie würdt getrucket ohne End.
In sonderheit mit Kranckheit schwer/
Die im zu schicket Gott der Herr:
Durch welche der Mensch auff der bahn/
Täglich vnd vil wirdt griffen ahn.
Bis das er endlich durch den Tod/
Erledigt wirdt auß aller noth.
Aber in diser Straff behend/
Die Göttlich gnad sich zu im wende.
Laßt wachsen auß der Erden fren/
Vil guter nutzlicher Arsney.
Dann kein Kreutlin erfunden würt/
Das sich zur Arsney nit gebürt.
Insonderheit hat Gott der Herr/
Geben vil heilsamer Bäder.
Wsonders in disem Herzogthumb/
Haben wir sie in guter sumb.
Die sein nun auß der massen gut/
Wie die erfahrung geben thut.
Zu Göppingn fleußt ein Sawrbrunn fein/
Zu trincken vnd zum baden gemein.
Es trincken in hoch vnd nider/
Gibt den Leuten jr gsundheit wider.
Diser Brunn bekompt mir sehr wol/
Darumb ich in dann gar offt hol.

Durchs

Durchs Wildbad vil Leut gesund werdn/
Die sonstn lägen in der Erdn.
Zu Welken hats in Bad des gleich/
Da baden beides arm vnd reich.
Das Zellerbad gibt frischen mut/
Das Sewbad d'runden heilen thut.
Thonnecherbad gefelt wir wol/
Das Blesibad man loben sol.
Vnd was dergleichen Bäder mehr/
Die vnser gnediger Fürst vnd Herz.
Im Herzogthumb gar löblich hat/
Vil kosten drauff wendt frü vnd spat.
Vber die hat der löblich Fürst/
Den stets nach löblichkeit getürst.
Ein newes Wunderbad angericht/
Zu Boll (welchs ich selbs hab besicht.)
Vnd solchs allein auß freyen muth/
Den armen vnderthanen z gut.
Vnd das menniglich in der zeit/
Gedienet werde weit vnd breit.
Darauff mann dann abneimen kan/
Sein Fürstlich gmüt ganz lobesan.
Dann ire Fürstlich Gnaden schon/
Haben ein schweren baw gethon.
Welcher nun albereit ist außgeführt/
Ein merklich summa Gelds berürt.
Vnd solchs dir/mir/ja alln zu gut/
Damit (doch vns Gott alle b'hüt.)
So wir von Kranckheit heim gesucht/
Zu disem Bad hetten zuflucht.
Wer wolt dann nit jrn Fürstlichn gnaden/
Warnen vnd wenden allen schaden.
(i) ij. Dann:

Dann vber alle gutthat groß/
De wir erlangen ohn abloß.
Ist diß fürwar die gringste nicht/
Die vns durchs Wunderbad geschicht.
Nicht allein disem Herzogthumb/
Sondern ganz Teutschland in der sum.
Wirdt durch des Fürstlich Wunderbad/
Gewendet werden mancher schad.
Darumb jr Vnderthan all san/
Nimpt Ewers Herzog gutthat an.
Stehe auff du werdes Teutsche Land/
Beut vnserm Herzog deine hand.
Danck jm für dises Wunderbad/
Das durch jr Fürstlichen Gnaden stath.
Gott wöll jrn F. Gnaden gut/
Allzeit halten in seiner hut.
Sampt dero Fürstlichen gemahl/
Auch Junger Herrschafft guter zahl.
Auch den Fürstlichen Fräwlein fein/
Die des Lands Wirtemberges schütz sein.
Ein löblich Bad würd werden daß/
Zu loben ist ohn alle maß.
Vnd ob wol solchs von alters her/
Etlicher massen bekantt wer.
Jedoch wirts erst werden bekantt/
Durch Doctorn Joann Bauhin gnannt.
Der jrn Fürstlichen Gnaden zwar/
Leibdoctor war vil lange jar.
Disem berümpften glehrten Mann/
Jr Fürstlich Gnaden fürstlich han.
Von Mümpelgart her gfordert nun/
Daß er sein bestes solle thun.

Vnd

Vnd sehawen fleißig zu der sacht/
 Was man bey disem Brunnen mach.
 Das soll er beschreiben alles sampt/
 Damits mániglich werd bekant.
 Diser brümbt Mann oben genannt/
 Nam diß Werck gwaltig vnder d'hand.
 Beschreibs in Lateinischer Sprach/
 Damit aller die Teutschen auch.
 Solchs Wunderbads vnd ganser gschicht/
 Hetten ein guten satten bericht.
 Thut ers verteutschen alles sampt/
 Zu dienst dem werden Teutschenland.
 Der Hoch glehrt Mann durch seine kunst/
 Hat laboriert vnd nit vmb sunst.
 Sonder bey disem Wunderbrunnen/
 Vil seltsam stein vnd sachen funden.
 Die all auß disem Brunnen kamm/
 Ich wils nennen mit iren namn.
 Schiferstein mancher form vnd gstat/
 Die all artlich sein abgemahlt.
 Etlich den Schlangen sehen glich.
 Etlich den Schnecken ganz ehnlich.
 Etlich schier Menschen Gesicht han/
 Sichs einer mit verwundern an.
 Fawrstein ein ander vngelich/
 Schnecken ganz wunderbar greißlich.
 Belemnitem sonst Albschoß genannt/
 Hab ich selbs ghabt in meiner hand.
 Spah wie die Erknappen nennen/
 Ist auch im Brunnen gewesen drinnen.
 Bech drauß mit hauffen gnommen ist/
 Welchs man noch find zu diser frist.
 (:) iij Augstein/

Augstein/Salz/Schwefel anders mehr/
Ist gefunden worden nach der schwer.
Diß als ist durch den berühmten Mann/
Gefunden vnd probieret schon.
Durch distillation vnd sunst/
Nach löblicher vnd werder kunst.
Vnd das ein sondere Gottes gnad ist/
In disem Mann zu diser frist.
Das er solch Metall vberal/
Vnd was sie für wasser ohn zal.
In sich begreiffen hat probiert/
Wie in disem Buch gefunden würt.
Vnd damit nun sehr seinen fleiß/
Zu vnser Herzogs lob vnd preiß.
Hat er darinn sein fleiß gethan/
Die Badleut selbs gesprochen an.
Examiniert/vnd geschriben zusam/
Ein ganz weitleuff historiam.
Wie es sey gangen in dem baden/
Ob sie sein heil von irem schaden.
Da hats sichs funden guter massen/
Das bey jnen hab nachgelassen.
Darumb man dann in diß schreiben/
Deß bades lob thut hefftig treiben.
Wie heilsam glegen sey das Bad/
Wies einem nutz dem andern schad.
Vnd was das für ein lustig ort/
Zeigts es als an von wort zu wort.
Das es groß krafft vnd würckung hab/
Ist darben leichtlich zunehmen ab.
Dann die Metall die krefften han/
Deß sie ein Menschen heilen than.

Darzu

Darzu die erfahrung wie gmeint/
Disem erfahrenen Herzn bey Felt.
Darumb er auch durch all glidmaß/
Anzeigt wie vns da helffe das.
Vnd wer des Bads soll müßig gahn/
Mit fleiß solchs weit gezeiget an.
Vnd so jemand will brauchen S'bad/
So find er hie auch guten rath.
Was man muß thun/ vor/in vnd nach/
Das einr nit komm in vngemach.
Wie man den Dampff soll fahen auff/
Ein wenig oder auch mit hauff.
Dessen hat man hie guten bricht/
Wie man in der Histori sicht.
Vnd so jemand an einem glid/
Nit hette weder ruw nach frid.
Wie solcher nit mit ganzem Leib/
Soll baden das ers von im treib.
Sonder daß er das glid allein/
Könt wider baden hüpsch vnd rein.
Nämlich durch dämpff vnd durch den trauff/
Die man artlich wirdt fahen auff.
Wie denn der augenschein wirdt geben/
So vns Gott wirdt fristen s'leben.
In summa nichts vergessen ist/
Das nit auff's best werd zugerist.
Weiter bschreibt diser brümbte Mann/
Das Wunderbad ganz lobesan.
Was es darumb für glegnheit hab/
Wies auch fein artlich gemahlt ab.
Durch Figur vnd Historiam/
Ist alles fein artlich beyfam.

Was für Stätt/Schlösser/Dörffer sein/
Hierumb in diser gegend sein.
Vnd für gelehrter Arzt da hab/
Ist alles lustig bildet ab.
Vnd was für Apoteccker frey/
Man haben könn zu der Arzney.
Würdt fünfftigen Badleuten zgüt/
Ganz engentlich hie gführt zu gmüt.
Ausz welchen allen jederman/
Zesund gar leichtlich sehen kan.
Was diser Hochglert Medicus/
Geleistet habe ohn verdruß.
In diser gegend Kraut vnd Frucht/
Ist als von im worden durch sucht.
Von Obs Apffel/Birn vnd dergleichen/
Als wenn er selkams mögn erschleichen.
Ist bschriben vnd abgmahlet wol/
Vnd deß ein ganz Register vol.
Von Vögeln vnd andern Thier.
Hat er nichts vberglassen schier.
Das ers nit alls er fundigt wol/
Drumb man in billich loben soll.
Als der ein brümbter Physicus/
Ab disem allm hat kein verdruß.
Vnd so ich solchs fleissig betracht/
(All Medicos doch vnveracht.)
Halt ich nie das seins gleichen sey/
So wol erfahrn in der Arzney.
Philosophus Crimius/
Ist diser Hochgehrt Medicus.
Welches denn leichtlich jederman/
Ausz disem Buch wol verstehn kan.

Vnd

Vnd das diß Wunderbad vnd Brunnen/
So klärlich kompt an dise Sonnen.
Da dancken wir erstlich Gott drum/
Nachmals auch vnserm Herkog frumb.
Zum tritten disem Medico/
Ders alles hat bschriben also.
Damit es auch in alle Land/
Durch diß schreiben wird wol bekant/
Diß Wunderbad so grecht vnd gut/
Zu loben hab ich meinem mut.
Dann ich nit halt das diser stund/
Ein Bad werd funden so gesunt.
Wie diß Bad ist zu diser zeit/
Wenn einr reist in all hundert weit.
Dann weil es auß so vil Met all.
Zu sammen fleisset vberall.
Welche alle als mittel ganz eben/
Zu der gsundheit von Gott gegeben.
Kan es nit fehlen in gemein/
Es muß ein heilsams Wasser sein.
Vnd weil die arme Leut jekund/
Die baden auff die jekig stund.
Oder trincken des Wassers nun/
Werden fertig vnd gsund darum.
Was meint einer das wol werd gschehn/
Wann diß end krefftig wirdt angehn.
Da man nit vnderm Himmel auß/
wirdt baden/sonder im Badhaus.
Da alle glegenheit wirdt sein/
Auff aller best erbawen fein.
So wir d'legenheit sehen an/
Solchs rings herumb ein weiten plan.

(i) v

Ein

Ein lust von aichen des gleichen nicht/
Bald gläsen wirdt in einer gschicht.
Ir F. Gnaden habn goordnet fein/
Ein lustgarten zmachen dahin.
Da dann jekund die Badleut gut/
Vil kurzweil finden vnd jrn mut.
König Arti hof im weichen würdt/
So es vollend wirt außgeführt/
Wie es jr F. Gnaden gut/
Machen zu lassen han ein mut.
Das Badhaus eben ist gwehlt/
Auff schönen Stein in Seulen gsteht.
Drey Kessel groß es drinnen hat/
Darauf man warm wirdt giessen an.
Ein schön Wirtshaus ist dran gebawt/
Das einer gern mit augen schawt.
Da wirdt eim jeden geben ein/
Sein gmach/ Stüblein vnd Kämmerlein.
Dann wo kein rechtes Wirtshaus ist/
Da ist gefelht zu diser frist.
So sag ich auch bey meinen End/
Wirts da gebn gut schnabelweid.
Darzu dann wirdt vil helffen thon/
Das in der nähen vil Stätt stohn.
Vnd vil statlich flecken darzu/
Da man wirdt dapffer ohne ruh.
Zu führen/tragen/nach der schwer/
Alles was nun ist dein beger.
Wirst du bey disem Wunderbad/
Finden vnd haben durch Gottes gnad.
Dann glegenheit die gibts an d'hand/
Dergleichen kaum ist in dem Land.

Apotecke

Apotecker vnd Medicos/
Hastu schier ligen in der schoß.
Wen welchen du kanst finden rath/
So dir das Bad nit recht zu stah.
So han jr Fürstlichn gnaden nu/
Geben ordnung vnd gsaß darzu/
Wie sich bendes junge vnd die alen/
Sos Bad gebrauchen sollen halten.
Damit Gottseligkeit geübt/
Vnd sonst niemand auch werd betrübt.
Was mehr diß bades nutzbarkeit/
Sampi andern werd jr finden bscheid.
In disem Buch so diser frist/
In offnes trucken geben ist.
Gott wöll jrn F. Gnaden eben/
Frid geben vnd lang lassen leben.
Das sie vil lust vnd wohne schaw/
Im Herkogthumb vnd disem baw.
Der darauff ist gesehen an/
Das sie darmit dien jederman.
Dich bitten wir O höchster Gott/
Der du vns allein hilffst auß noth.
Whüt vns vor allem vbel wol/
Sos aber nach dem willen sein sol.
Daß wir mit Kranckheit werden gschlagn/
Mit mancherlen seuchen vnd plagn.
Daß wir diß Bads gebrauchen müssen/
Laß du vns solches wol erschiesen.
Gib beedes Krüppel vnd den Lahmen/
Die gsundheit wündsch ich allen/ Amen.

[Faint, illegible text, likely bleed-through from the reverse side of the page]



AB: 754885

ULB Halle
003 916 847 3



Sb

VD17





B.I.G.

Farbkarte #13

und Warhafftiger

Bericht:

Schwärer vnd lerhand Kranckheiten/

1615 1599. wol vnnnd glücklich seyen ges
Gnad Gottes/ vnd wunderbarliche wir-
erbads zu Boll im Herzogthumb
berg gelegen/so da newlich
erfunden/

urchleuchtigen vñ Hoch-
nd Herrn/ Herrn Fridrich Herzog
nd Teck/ Graff zu Mümpelgart/ıc.

gelehrten vnnnd Weitberümbten H.
i. S. Württemb. Archiatrum/ Newlich
weitleufftig beschrieben vnd in
K verfertigt worden/
digen Historien/ von ime vnd anderen da-
würtiger erfahrung hinzugethan.

Jetzund aber
ich verzeichnet worden / durch den
Ioan. Rentzium S. W. Medicum
ermelten Wunderbad.

en könne/ was wunderlicher Wür-
höpffer/disem heilsammen Brunnen
vnd menniglich Gott darumb
vnd mit desto besserer zuversicht
lbigen nutzen vnd gebrau-
chen könne.

Mümpelgart / durch Jacob
let/ S. W. Buchtrucker.

M D X C I X.